

069 洞真高上玉清隱書經

經名：洞真高上玉清隱書經。
簡稱《玉清隱書》。撰人不詳，約出於東晉。係早期上清派重要經典。原有四卷八篇，後分作四種。即：《上清太上玉清隱書滅魔神慧高玄真經》三篇；《上清高上滅魔王帝神慧玉清隱書》三篇；《上清高上滅魔洞景金元玉清隱書經》一篇；《上清高上金元羽章玉清隱書經》一篇。今合併為一。底本出處：《正統道藏》正一部。

上清太上玉清隱書滅魔神慧高玄真經

神經出自高上大洞口訣，隱書天地萬精之音，以傳玉清消魔王神霄玉

清王，制魔召真，匡檢萬靈。太上以上宮玉女、金仙玉童各二百七十人，典香拂塵，侍衛神文，祕於太上三元紫房之內，六合宮中。

玉清帝君逍遙洞清之上，晏景龍山，時引高聖玉清之寶，消魔大神神霄玉清王，曲寢瓊瑤之內，金花之房，清齋三年，披誦高上高玄真丈，神奇出於自然，妙旨朗於十方，高韻落落，玉翰瑛瑛，神秀華庭，煥耀太空，八帝齊景，五老翼真，玄始暎朗，天元敷陳，伏獸攘據，猛馬奔驚，大帥仗旛，羅騎億千，檢魔攝邪，檄落萬靈，山海靜波，三光合明。於是帝君乃自彈景龍雲璈，百和合唱，瓊響太虛，蕭條流清，玉音激炁，八風交真於中天，五華羅仙於四隅，神嘯啓於琳琅之關，妙韻發於大洞之機。爾乃命北寒金臺龍華玉女，鬱蕭明、定雲敷、安延昌、飛四渠等，合歌高上洞神之詩，滅魔招真之曲，其詞曰：

偶景策飛蓋，迅轡浮八清。整控啓丹衢，流盼宴雲營。協神飄津波，蹇

趾步寒庭。龍翰躍玉質，羽服翠紫駢。超凌六領臺，紛紛落鳳城。携提神霄王，高會太上京。仰披三素房，長煙灑八溟。至道趣蘭闕，縹緲虛上生。絕峰通妙觀，太暉朗玉清。積勤感太素，誰測形與名。待劫未終旦，倏歛肇萬齡。冥運自有會，安知天地傾。乘我自生運，策景涉北元。流霄隨我迴，飛蓋蔭綠轅。高登四明闕，華瓊秀金門。神暉洞蘭峰，三景煥已分。結朗始生炁，八會坦幽源。落落玄漢初，太陽協朝晨。靈化四蓋庭，妙暢法亦全。運理自然道，鬱若高上文。千祆無賈生，檢制天魔羣。玄會大洞野，採精掇日魂。含精鍊丹房，長保無終椿。迴輦寢丹房，默想念高玄。閒寂無塵累，盼目霄中寶。凝神標九領，連更續長煙。三燭朗太暉，絕空中生真。秀景曜玉州，協神整華年。幽邁應冥會，眇眇逐景遷。萬感自啓運，良謀亦有津。玉帝理靈襟，蕭蕭九重天。獨步冥領峰，從懷在無間。自無高仙韻，躡彼亦何緣。道藏金極章，寶我玉清篇。太虛

洞玄清，清中生玄微。碧雲繞丹房，絕宇曜紫暉。抗足萬津波，玄步登玉扉。八風鼓高峰，雲萬何淒淒。龍鳳鳴九霄，禽籟唱何悲。靈境無崖際，四顧皆空垂。莽莽天漢塗，飄飄上清畿。冥攄應感會，玄寂真人懷。數來劫自運，理極神自歸。明誦高上文，密求反華頽。轉詩以招真，神慧變天威。制命合玄符，握節徵太微，妙覺無凝塊，廓然靈關開。併景反寂轅，高超絕嶺飛。玄栖重虛館，靜想高神迴。

歌畢，於是帝君即命五老上真，請高上大洞滅魔神慧高玄真經玉清隱書，〔盛〕以雲錦之囊，封以啓天之章，付仙都左公掌錄瓊宮，以玉華之女，金晨玉童各三十七人，執巾典香，侍衛神文。依四極明科，七百年一傳，自無玄名帝圖，刻簡來生，金骨玉髓，挺命合仙，不得參聞。其道高妙，故曰隱書，太上所寶祕，不傳於下世。輕泄靈文，身負風刀，萬代被殃。

高上神經，皆上表高真之祕諱，下載天地萬精之音，以招仙滅魔，通理幽

關。皆出高上口訣，以施大洞真經，上宰注筆，太一拂筵，玉郎譔目，天妃結篇，五帝集校，以成靈文。五老監試，左仙輔真，太華典香，金晨揚煙，神奇發逸，玉慧洞明，靈化威乎天地，文翰煥乎上清，發口則聲參太微，高上遙唱。誦之一遍，則九天駭聽，玉帝禮音，萬真監庭，羣凶滅景，天魔摧傾。行此之道，則炁達清霄，澤布九津，拔度七祖，更生上天。以標神經之妙貴，可謂難可載勝焉。凡修迴風混合大洞真經三十九章，皆當先誦高上滅魔神慧一遍，以滅試招真，通理三關，惠整形骸，令蘭炁布津，萬神定位，調暢玉聲，炁和響清，乃誦妙章，金音朗徹於高上，妙旨淒粲於十方，則皇老遙監於丹苦，三元記勒於紫房，拔七祖於幽塗，度更胎於南仙，生死享其祚福，榮美流於種親。其道秘妙，不得妄宣，輕泄靈音，身沒河源，七祖謝責，結罪幽山，九天禁書，非真勿傳。

大洞滅魔神慧玉清隱書

玄景散天湄，清漢薄雲迴。妙炁煥三晨，丹霞曜紫微。清天舒靈彩，流霄何霏霏。神燈朗長更，離羅吐明暉。四嶺帶高雲，懸精廕八垂。三素啓高虛，蘭闕披重扉。金墉映玉清，靈秀表天畿。風生八會宮，猛獸騁雲馳。紛紛三洞府，真人互參差。上有干景精，冥德高巍巍。太一務猶收，執命握神麾。正一履昌靈，攝召萬神歸。公子翼寂轅，洞陽衛玄機。明初合道康，龍輿正徘徊。七景協神王，鸞輪萬杪階。體矯玄津上，飛步絕嶺梯。披錦入神丘，璨璨振羽衣。冥攄交雲會，飛景承神通。清峰無毫蒼，綺合生絕空。金華帶靈駟，翼翼高仙翁。萬轡承虛散，翳藹玄上窗。中生合景君，九帝昌上皇。明輪映黃寧，羽珠曜玄陽。天精元素炁，中五號養光。結朗始生神，九真合成雙。妙景啓冥數，順感標神蹤。泥丸洞元光，運珠正絳宮。元陽部命

門，三神携紫童。拘制招上歸，夾闕侍明窗。翳鬱對啓明，圓華煥三冲。方盈引接生，反老迴嬰蒙。飈粲麗九天，天綠繞丹房。蕭蕭纏靄表，曲降寢華堂。遊宴吟萬變，歸會神霄王。仙道樂子生，鬼道樂子凶。但聞貴生道，不聞鬼道隆。謠歌參天炁，賈生無正章。神慧命朱兵，五帝符寒鄉。仗旛攝萬魔，瓊文檢北艷。體解自然道，妖滅非爾功。汎晨鼓長扇，含靈慶霄峰。俯盼四謝飛，天劫永難終。妙中生真景，迴輦苦遲遲。意合在冥感，携提高上猗。翔翅期妙會，洞觀情轉悲。嘯咤咄嗟頃，倏歛歷九圍。攝炁反交初，併景幽玄栖。

於是七精停曜，重闕洞開，百陽激電，五星奔移，握節命靈，是炁悉追，鐵熊羅遮，猛虎變威，六師斬妖，銅頭捕非，攫天啖毒，晶壘消摧，萬精滅種，六天崩頽，三道正行，何炁不迴，山河爲之傾倒，日月爲之昇暉，靈獸爲之墮領，金翅爲之落飛，五帝束帶於神宇，萬靈受對於太微，高上汎蓋於丹崖，八

景策駕於霄扉，觀洞源之妙化，欣我道以坦懷。

大洞高玄真人曰：欲登高座，披誦《大洞真經三十九章》，當先平坐，正視北向，叩齒三十二通，閉眼思己身著九色羽衣龍文之帔，頭冠玉晨之冠，手執九色之節，青龍侍左，白虎衛右，頭簷華蓋，下坐獅子，仙童侍香，玉女散華，紫雲翦鬱，滿於堂宇，五色玄黃，羅列前後，內外分明，皆使曠朗，便誦滅魔神慧隱書一篇。誦畢，又閉眼默念，心拜四方，口引東方青陽之精青炁九嘯，使充布肝腑之中；次口引南方丹靈之精赤炁三嘯，使充布心腑之中；次口引西方金魂之精白炁七嘯，使充布肺腑之中；次口引北方玄曜之精黑炁五嘯，使充布腎腑之中；次口引中央高皇之精黃炁十二嘯，使充布脾腑之中。嘯五方都畢，微祝曰：

五炁混生，玄上之精，充布五府，六管鮮明，內灌外逸，表裏俱清，滅穢招真，我飛太靈，常對高晨。

誦大洞真經畢，便振左手三過，法

擲流鈴，振右手七過，法擲豁落七元。次仰頭，次搖頭九過，法承天。次鼓脚一過，法震靈。搖身二七過，以歡萬神。次拭目三過，明三光。次捻鼻七過，通明梁。次捻眉後兩門三過，塞邪源。次輪身三周，開天窗。次嚙液九過，服玉津。一身都畢，萬神皆歡，調聲正炁，乃誦玉章，微呪曰：

承天履地，出入洞門，左振流鈴，右擲七元，帶金佩玉，仙衣紛紛，八景羅列，策輿乘雲，萬徧朗達，飛入帝晨。畢，乃平坐誦經。

此大洞之妙格，俯仰之儀，使庠序得法，則高上盼目，三元降席，萬靈朝禮，天魔降伏，五苦咸解，七祖受福，神鳳來翔，雲龍踊躍，衆仙稱善於高虛，五老刻名於帝錄。

凡修上道，披誦靈章，而不行此法，虧忽天儀，於俯伏不足，則爲北帝鬼神所笑，三官所罰，羣妖試敗，身喪無益。故違道者易，修道者難也。得其儀格，將有飛騰之階級也。

大洞消魔神慧內祝隱文

讀高上虛皇君道經，當思太微小童于景精真之炁，赤色煥煥，從兆泥丸中入，下布兆身舌本之下，血液之府。畢，微呪曰：

真炁下流充幽關，鎮神固精塞死源，玉經惠朗通萬神，爲我致真命長存，拔度七祖反胎仙。畢，引赤炁三嚙止。便讀經，經畢，又祝曰：

天有大隱生之寶，稱曰明梁之上炁，守我絕塞之下戶，更受生牢門之外。乃又召益元之羽童，列于綠室之軒，使解七祖百結，隨風離根，配天遷基，達變入玄。

玉清隱文又祝曰：

元炁非本生，五塗承靈出，雌雄寄神化，森羅邃幽鬱，玉音響太和，萬唱無中發，仙庭迴九變，百混同得一，易有合虛中，俱入帝堂室。畢。此高上內祝祕文，泄之七祖充責。

讀上皇玉虛君道經，當思太一尊

神務猶收真炁，紫色爛爛，從兆泥丸中入，下布兆玉枕之下泥丸之後戶。畢，微祝曰：

太一保命，固神定生，爲我上招帝真之炁，下布紫戶之庭，玉經仰徹，九元朗朗，七祖同歡，俱昇上清。畢，引紫炁三嚙止。便讀玉經，經畢，又祝曰：

兆身常死關，結胎害百神，百神解胎結，披散胞內根，七世入帝室，一體合神仙，神仙會玉堂，七祖生南宮，併帶理明初，同席孩道康，萬真守身形，是日藏初明，帝一迴雌雄，保鎮百神門，閉塞萬邪戶，受事九宮間，典禁召司命，三日朝泥丸。

讀皇上玉帝君道經，當思帝君逢陵梵真炁，紫光鬱鬱，從兆泥丸中入，下布兩眉中間紫戶之外宮。畢，微呪曰：

帝君度符籍，正氣召萬神，上招玉真炁，充布兩眉間，混一生帝景，三素成我仙，飈粲乘飛蓋，逕昇高上軒。畢，引紫炁三嚙止。便讀玉經，經畢，

又祝曰：

扶晨始暉生，紫雲暎玄阿，煥洞圓光蔚，晃朗濯耀羅，眇眇靈景元，森灑空青華，九天館玉賓，金房唱霄歌，賢哉對帝賓，役召伯幽車，七祖解胞根，世世爲仙家。

玉清隱文又祝曰：

丹皇運珠，守鎮死門，上一赤子，玄帝凝天，一名伯無上，亦爲三元先，扶我亦養我，使我登雲輪，常坐上清軒，七玄爲仙君。

讀上皇先生紫晨君道經，當思左無英公子玄充叔真炁，玉光奕奕，從兆泥丸中入，下布兆左腋之下肝之後戶。畢，微祝曰：

無英神真生紫皇，三炁混合成宮商，招引真炁鎮膀胱，通流三丹會洞房，爲我致仙變丹容，飛昇雲館入金墉。畢，引玉光三嚙止。便讀玉經，經畢，又祝曰：

神安炁洞，上與天通，越出地戶，過度天門，隱息四維，七星散分，飛行陰房，日月植根，守金藏玉，制御萬神，

仙王何人，我已成真，隱存雌雄，洞一四鄉，結中青炁，號爲延昌，字曰和嬰，理命永長，玄歸固內，慶玄牢張，我日成真，飛仙雲京。

讀太微天帝君道經，當思右白元洞陽君真炁，金光耀耀，從兆泥丸中入，下布兆右腋之下肺之後戶。畢，微祝曰：

洞陽鬱靈寶魂生，金光煥煥炁中精，招真固神令長生，拔出幽根返胎嬰，驂晨御炁昇玉清。畢，引金光三嚙止。便讀玉經，經畢，又微祝曰：

洞陽鬱靈標，守體死戶門，開出三尸蟲，受入九真源，解胞散滯血，百節生正神，七祖滅尸禍，拔殖後葉患，黑炁滅來生，斫斷胞死根，上世受道德，後來獲帝仙，帝仙是何人，明明七葉孫，乃祖入丹都，併坐精上門。

讀三元紫精君道經，當思中央司命丈人君真炁，紫雲之色爛爛，從兆泥丸中入，下布兆絳宮心房之中。畢，微祝曰：

司命定年，丈人保仙，度名於南

宮，上奏帝君前，世世爲仙王，拔出七葉根，福報無窮已，皆是玉經言。畢，引紫雲炁三嚙止。便讀玉經，經畢，又祝曰：

會元三襟交，携領迴胎嬰，承光守下關，務玄待月明，於是混離固鑰，明車受成，福延七世，禍散玄生，守景六合，陵梵七靈，共生億千，歛昇玉庭，嬰兒徘徊，羽衣命仙，吉濟萬萬，福布千千，骨有玉暎，血承瓊泉，生樂天地，日月同年。

玉清隱文又祝曰：

福布七玄前，罪滅三徒中，靈吹九晨杪，納炁太帝宮，五仙携太一，併立重冥空，遂隱上清室，羽明帝一房。

讀真陽元老玄一君道經，當思命門桃君孩道康真炁，黃雲之色，從兆泥丸中入，下布兆臍中命門之外。畢，微祝曰：

真靈正神，號曰桃君，混合生宮，守護命門，通仙致炁，齊景寶雲，七祖同生，受福高晨。畢，引黃雲之炁三嚙止。便讀玉經，經畢，又微祝曰：

五嶽真人，定錄四寶，司錄促到，護籍理民，道康握節，雲拘報籙，香風八被，惡魔絕煙，并來對帝，萬萬稱臣，度我生籍，名遷玉門，扶翼五符，鎮護波塵。

玉清隱文又祝曰：

太上時非子，一曰合精延，是爲命門王，可以召萬神，萬神即時到，合會瓊羽門，使令散禍，禍絕福連，上寢玉堂，世受名仙。

讀上元太素三元君道經，當思泥丸天帝上一赤子真炁，炁如寶光，從兆泥丸中入，下布泥丸九孔之戶。畢，微祝曰：

上元赤子號上真，飛雲羽衣耀紫煙，上招明景對帝寶，寶光奕奕暎我身，身生毛羽昇九天。畢，引寶光三嚙止。便讀玉經，經畢，又祝曰：

童子景精，有神有威，合象三形，九道相推，衣服朱丹，步正參差，出入上元，太極內階，知我者生，存我不衰，人無哭兆，恃賴辟非，欲知吾處，密問太微，太微玉帝，三聖徘徊，俠我左右，

一合俱飛，混洞六府，日月齊暉。

玉清隱文祝曰：

九道轉對，五老各寧，洞陽銜籍，

號曰鬱靈，七世父母，反胎更生，累業積罪，罪泄福生，上入帝堂，受書丹明，常與伯史原，徘徊三界庭，巾金佩羽，寶曜圓形，玉輪北迴，役御朱兵。

讀上清紫精三素君道經，當思絳

宮中一元丹皇君真炁，日光之色，從兆泥丸中入，下布項中大椎骨首之戶。畢，微祝曰：

中一真君，號曰連珠，上招日光，

灌我形軀，三真寶曜，固命玉符，壽億萬年，永無終休，身生羽服，飛昇天衢。畢，便引日光三嚙止。便讀玉經，經畢，又祝曰：

天有九魂，不可不分，道有三真，不可去身，帝一變景，萬化以臻，流珠停暉，紫霞踊煙，七度迴絡，三光暎真，太上精符，相與爲親，司命銜月，噓我重脣，五老銜日，吸我三便，太上道君，與我纏綿，上造天階，携把太真。

讀青靈陽安元君道經，當思命門

下一黃庭元王真炁，月光之色，從我泥丸中入，下布兩丸間車軸下戶。畢，微祝曰：

下一真元王，號曰始明精，三皇把符命，金契度仙庭，上招景中炁，炁布灌我形，羽車曜雲羅，令我飛上清。畢，便引月光三嚙止。便讀玉經，經畢，又祝曰：

五藏百結，生此萬疾，玄一林虛，開關解結，結絕病散，精神盈溢，福炁充明，禍翳傾竭，仙心日臻，死道月絕，混化九君，合符帝一，七神奉符，公子入室。

讀皇清洞真道君道經，當思泥丸九真帝君上皇真炁，青光萬丈，從兆泥丸中入，下布口之四際。畢，微祝曰：

九真始生，生於上元，號爲先靈，三景各分，上招玄暉，布流四門，鎮神保仙，拔度七玄，驂景乘浮，朝拜三元。畢，引青炁三過止。便讀玉經，經畢，又祝曰：

七炁離羅，大混黃寧，六甲輔魂，內注六丁，三真入胃，液流太明，五符

上皇，泥丸常生，九星下暎，日每同軌，遊盼八迴，雙蓋華纓，上到紫房，披巾羽青，七世父母，各得反生。

讀高上太素君道經，當思膽中八真合景君真炁，黃雲之色，從兆泥丸中入，下布兆背中骨節之府。畢，微祝曰：

八真結神，神生九天，號曰北臺君，常在三合間，招真洞明炁，下流布我身，身生紫暉，與帝結親，携契五老，太仙纏綿。畢，引黃炁三嚙止。便讀玉經，經畢，又祝曰：

生生得帝心，各會重戶內，紫房混五神，魂魄恒寶貴，七關受仙輝，五藏充玉炁，俱過水火天，披建四和蔚，上歸皇一子，與兆魂相對。

讀皇上四老道中君道經，當思兩腎七真玄陽君真炁，黑雲之色，從兆泥丸中入，下布兆背窮骨地戶中。畢，微祝曰：

七真生帝景，八炁運常寧，上招日中童，圓珠暎我形，迴風混幽府，歸妙大洞經，拔出地戶難，超凌逸九天。

畢，引黑炁三嘸止。便讀玉經，經畢，又祝曰：

太一鬱書，上登洞房，六合三寶，司命神公，手執錄籍，駕景乘龍，左迴靈曜，右扇神風，峨峨隱珠，芬豔嬰蒙，浩觀太無，濯鍊五通，澄魂羽幽，鍊魄空洞，招兆百神，月常之功，七祖順生，景福昌隆，迴我老艾，還復玄童，上對神霄，金光十方，飛騰玉輪，彈金鳴鐘。

讀玉晨太上大道君道經，當思肺中六真上元素玉君真炁，白雲之色，從兆泥丸中入，下布兆頸外十二間梁之中。畢，微祝曰：

六真奕奕，白光央央，迴帝之景，上入丹鄉，招真下流，灌我玉漿，羽裙紛紛，衣我仙裳，越過水火，飛登神京。畢，引白炁三嘸止。便讀玉經，經畢，又祝曰：

九合三離，紫房散分，五老正嚴，帝一保神，司命奏籍，奉符三元，胞樹斷落，血尸絕根，反胎火朱，迴炁泥丸，我合九清，大混百神，身登玉房，同駢金仙，逍遙太素，徘徊三天，重華列簡，

黑支流玄，世爲道伯，大福纏綿，上寢玉清，下息命門，五藏秀華，項負日魂，長保劫齡，後天常全。

讀太清大道君道經，當思脾中五真養光君真炁，如玉光金真之色，從兆泥丸中入，下布兆喉內極根之戶。畢，微祝曰：

五真散靈，布炁九玄，金光曜暉，玉炁吐津，萬神並暢，熙怡我身，圓光奏命籍，太一勒九天，降致八景輿，策龍駕素煙，混合三帝室，保我億劫年。畢，引玉光三嘸止。便讀玉經，經畢，又祝曰：

晨登九景臺，夕入神霄門，太一神夫子，或曰三來瓮，左執兆符籍，右携洞陽君，定生會紫房，五神更混分，混分逸帝堂，七祖絕死根，五毒炁零滅，翳津無浮連，令我尸血化，帝房出金元，三塗絕苦樹，世世獲天仙，常與景中王，積劫保元元。

讀太極大道元景君道經，當思肝中四真青明君真炁，青雲之色，從兆泥丸中入，下布兆胃管之戶膏膜之下，微

祝曰：

四真常生，青光華精，徘徊秀朗垣，沈彌玉景庭，携提高上元，俯仰要五靈，拔解七葉根，與我保華嬰。畢，引青炁三嘸止。便讀玉經，經畢，又祝曰：

帝室混身，一道萬分，萬分合別，是曰帝一，白帝皓靈，金霞迴日，重冥幽寥，藏神化密，把兆五符，與天相畢，玉暉覆蓋，無死無疾，七祖父母，超登丹室，胞根八解，死符絕滅，帝得五元，我迴三七，六腋煥華，金書羽札，世爲仙真，寶籙玄別，華繁曾玄，世无曲折。

讀皇初紫靈元君道經，當思精血中三真元生君真炁，赤雲之色，從兆泥丸中入，下布兆鼻兩孔下源之中。畢，微祝曰：

三真煥光，流丹徘徊，離合九景，三洞金扉，上招朱童，五苦廓開，死根斷落，日魂同飛，超逸十界，上昇玉階。畢，引赤炁三嘸止。便讀玉經，經畢，又祝曰：

七炁混合，帝一迴元，結滯月散，

兆命長遷，死道閉滅，斷絕胞根，五藏生華，六腑金鮮，帝一保形，司命保神，五符啓扉，五籍登仙，世爲道王，帝師纏綿，散香龍窗，反華揚煙，七携無上，八暉九陳，流源曲液，領會六淵，名書上清，炁積寂軒，迴風脫死，帝一相連，五通七合，俱生上元。

讀無英中真上老君道經，當思骨節二真堅玉君真炁，碧雲之色，從兆泥丸中入，下布兆太倉五腸之口。畢，微祝曰：

二真固神，鬱勃三關，迴金合玉，堅備泥丸，上通帝炁，布流金門，混化啓明，合我仙魂，七祖同飛，滅絕胞根，世保道德，永享欣欣。畢，引碧雲之炁三嚙止。便讀玉經，經畢，又祝曰：

魂生無中，布在九重，道出三極，常遊絳宮，三宮合化，是爲紫房，紫房所在，先由明堂，明堂之內，守神桃康，風雲鬱鬱，既清且涼，塞閉欲孔，割破戀根，其聖曰哥，其真曰靈，兆能知之，乃開金門，金門左右，忽見高賢，左曰父寧在，右曰母精延，此是景中伯，與

爾登玉晨，父寧母精，世世爲仙，萬條重華，皆受帝一恩。

讀中央黃老君道經，當思心中一真天精君真炁，絳雲之色，從兆泥丸中入，下布兆胸中四極之口。畢，微祝曰：

一真鎮心，總領百神，百神常生，會我絳軒，上招玉炁，六液沉玆，赤景啓靈，拔我七根，超逸三塗，上昇南仙。畢，引絳雲之炁三嚙止。便讀玉經，經畢，又祝曰：

帝一迴風，化合桃康，流生起福，上溢玉堂，混而合之，出入帝房，三五合一，必成仙君，七玄父母，滅尸散怨，萬劫千重，皆登上清，仙曲節伏扈，廣敷鬱中，守我形者，司命丈人，帝君公子，深固泥丸，太微玉華，羽服揚幡，魂魄長相抱，百骨皆滿神，神王生津上，超越度死門，遂友高上子，把籍玉清寶。

讀青精上真內景君道經，當思九元之真拘制真炁，五色雲炁，從兆泥丸中入，下布兆左耳伏晨之戶。畢，微祝

曰：

九元之精，天關開窗，八景合炁，上通金房，三元帝室，反老生翁，玉華灌溉，鍊改艾容，飛霄紫輿，運我昇空。畢，便引五色雲炁三嚙止。便讀玉經，經畢，又祝曰：

太微小童，常在帝前，其名景精，其姓曰干，合形太一，被服朱丹，五符命籍，把持玉案，帝君所臨，主通諸神，混合太上，司命丈人，固保靈戶，五藏會分，帝仙守宅，凶種滅根，三炁鬱敷，八迴五煙，我得昇霄，駕龍朗軒。

讀太陽九炁玉賢元君道經，當思皇一之魂上歸真炁，玄雲之色，從兆泥丸中入，下布兆右耳伏晨之戶。微祝曰：

皇一上真，洞生丹房，朱暎蘭曜，發溢明光，太元之音，朗徹九空，玄金獨樂，振響琅琅，上招玉景，協我神堂，策虛昇飛，遊宴玉京。畢，引玄雲之炁三嚙止。便讀玉經，經畢，又祝曰：

九宮一合，化形帝晨，上昇紫房，命真召仙，會濟魂魄，領括百神，七玄

康樂，披苦破根，死煙滅炁，福祿充軒，兆登太霄，駕景控雲，日中五帝，挾日精輪，鬱將逸阜，飈景同遷。

讀太初九素金華景元君道經，當思紫素左元君翳鬱无刃真炁，景雲之色，從兆泥丸中入，下布兆頭面之境。畢，微祝曰：

翳鬱生真，真景生空，靈炁昱昱，紫素融融，上致流津，下布我宮，身生水，體變玉光，飛仙羽蓋，昇入神公，受書玉京，成我仙宗。畢，引景雲之炁三嚙止。便讀玉經，經畢，又祝曰：

慶元吉津，流汨西田，太帝携手，命召高仙，披濁散穢，斷絕死根，上一天帝，號玄凝天，曜明六合，靖寂泥丸，是爲伯无上，使兆保長安，列圖玉皇，併襟帝晨，五府生華，六液龍源，淵清太素，鬱靄金津，萬仙來朝，五嶽啓陳，玄愆沉散，天福奏煙，彫梁守命戶，長來護死門，上生玉房，受位金仙，天之玉堂，常接帝賢，九天之中，宴盼劫年。

讀九皇上真司命君道經，當思黃素中元君圓華黃刃真炁，狀晨景之暉

上華，從兆泥丸中入，下布兆胸腹之境。畢，微祝曰：

九天上景，化生華暉，晃擘太空，曜真紫微，上致中黃，百神降迴，散根離苦，八難豁開，七祖同昇，福覆巍巍，使我神仙，八景齊飛。畢，引景暉之華三嚙止。便讀玉經，經畢，又祝曰：

太帝精魂，陽堂八靈，披散死炁，混合衆生，帝一承圖，三元會明，九真安安，七神寧寧，超越滯節，過度鬼兵，上昇帝晨，盼樂玉庭，玄母定錄，五府開清，胞根沒種，血穢殄平，七祖父母，起福三清，無英明夫，掌我仙經，廣神安炁，錄迴絕冥，閉藏死關，太混一生，長寢羽臺上，固神五老室，受錄上清闕，保德七元日，上上登玉霄，下下合帝一。

讀天皇上真玉華三元君道經，當思白素右元君啓明蕭刃真炁，狀月中之華，從兆泥丸中入，下布兆下關小腹至脚。畢，微祝曰：

白素啓明，九天同生，高虛素轡，浮景玉清，迴真曲仙，流灑八溟，通幽

達微，玄曜華精，使我內徹，五孔開明，神公來遊，我道克成。畢，引月華炁三嚙止。便讀玉經，經畢，又祝曰：

魂生九炁，炁變成神，五光纏會，太一化仙，二十四真，迴形帝先，九曲下戶，鎮生白雲，黃庭六腑，含養命根，胎結胞樹，種栽死山，一得拘制，受斷滅源，符籍清明，金暎玉軒，長爲德伯，世得道恩，昇登日月，遂友帝仙。

讀太一上元禁君道經，當思日中司命接生真炁，三華之色，從兆泥丸中入，布兆左手之戶。畢，微祝曰：

四大乘天，天元來歸，三華吐曜，司命景飛，爲我招仙，七祖散開，上登大靈，日月同暉。畢，引三華之炁三嚙止。便讀玉經，經畢，又祝曰：

太一務猶收，召北司玄一老子，握節往來，元素把符，白元守雌，煥然晨光明，披霞昇帝墟，列坐震靈席，混合五日房，白炁育尚生，青君案延昌，左携精上門，右抱合和嬰，我生日月華，友寶赤炁王，八景照泥丸，朗然洞房中，嬰兒爲赤子，混離生玉容，五道秀

金華，位爲上清公，七祖斷玄滯，身得乘神風，徘徊三清上，和樂返嬰童。

讀元虛黃房真晨君道經，當思日中桃君方盈真炁，日暉之色，從兆泥丸中入，下布兆右手之戶。畢，微祝曰：

元虛黃房內，日中號方盈，左宴朱領臺，右携仙皇庭，寢宴三秀房，結我神始生，同飛入玄玄，七祖反華嬰。畢，引日暉之炁三嚙止，便讀玉經，經畢，又祝曰：

九元鎮真，五帝纏綿，日月中王，與兆爲親，大混三五，離落魄魄，百節金暎，玉液迴神，五府生華，白炁運煙，充溢三清，紫房寶津，上開仙戶，下塞死關，令我羽簡，玉帝之前，七祖父母，反生南軒，虎服攝魔，龍旌命神，太一錦旌，召束三官，除滅死籍，刊名玉真，保生太一，日月同年。

讀太極主四真人元君道經，當思左目童子飛靈真炁，日之華光，從兆泥丸中入，下布兆左目之中。畢，祝曰：

四極太靈，元君精瑛，日華充溢，童明光光，二景相照，通我明梁，三丹

啓真，我道開張，毛羽羅裙，飛上上京。畢，引華光三嚙止。便讀玉經，經畢，又祝曰：

我乘混合炁，纏固九真丘，養光太昌子，併羅凝羽珠，九尊衆帝生，景洞迴須臾，七祖結解散，穢積忽已除，世世生福昌，玄玄獲仙書，身昇太霞宮，控龍宴玉虛，上朝上清皇，寢興幸正扶。

讀四斗中真人七晨散華君道經，當思右目童子晨嬰真炁，月之華光，從兆泥丸中入，下布兆右目之中。畢，微祝曰：

七晨飛華，華散三元，混合成真，上招月魂，爲我降靈，啓我仙門，七祖同飛，飛朝帝君。畢，引月華光三嚙止。便讀玉經，經畢，又祝曰：

三素牢張，上元老君，神生道固，我魄逸遊，保兆六合惱，憂苦沒曲門，死炁閉地下，身與帝一君，併襟樂六腑，鏡心丹玄房，熙炁泥丸野，體曜金暉，羽錄召真，白炁重鬱，百神光鮮，長與日月，符籍纏綿，世保道德，永爲天

仙，寂寂內注，遂昇帝庭。

讀辰中黃景元君道經，當思肺部童子素明真炁，五關暉光，從兆泥丸中入，下布兆肺部華蓋之門，上通兩目之童。畢，微祝曰：

童子素明，黃雲九纏，滄臺飛輪，三神協真，號曰玄上景，列位高皇賓，總攝命百神，携我入紫煙。畢，引暉光三嚙止。便讀玉經，經畢，又祝曰：

二老在左右，帝魂照九垓，陰陽變其上下，太一立其中根，五神衛其生質，司命塞我死門，九宮合而爲一，六合混而無量，世獲仙書，福慶纏綿，五老對席，以慶三元，偕一來迎，上昇帝晨，七祖滯血，皆爲拔根，反胎南宮，受生帝軒，兆宴玉堂，同襟帝輪，世世列圖，服羽揚旛，子子保昌，慶及後玄，長爲仙伯，役使萬神。

讀金闕後聖太平李真天帝上景君道經，當思胎中一元白炁君務玄子，太一精魂玄歸子，二神真炁，三華之色，從兆泥丸中入，下布兆五藏結喉之本戶。微祝曰：

金闕煥玉清，白炁暎丹霞，明光鬱金靈，五色吐三華，流津宴寢堂，結我始生牙，玉符召百神，威章徵萬魔，保此億劫仙，道明無凶邪。畢，引三華之炁三嚙止。便讀玉經，經畢，又祝曰：

天生八炁，迴合帝鄉，五神奉符，司命扶將，拔斷死籍，盪穢幽冥，七世解結，福延玉庭，血積沉沒，三素煥清，兆昇天堂，與帝合靈，世得仙契，所啓必成，種年日中，植命月庭，反胎童蒙，回爲孩嬰，生與天同，壽與日并。

讀太虛後聖无景彭室真君道經，當思結中青炁君按延昌、元君精魂保谷童，二神真炁，炁如玉華，從兆泥丸中入，下布兆五藏大胃上口。微祝曰：

離合九靈，二真幽密，太虛重天，上携太一，雌雄混合，同仙妙室，上變九仙，下解胎結，七祖慶欣，五苦解脫，使我飛騰，靈化本質。畢，引玉華三嚙止。便讀玉經，經畢，又祝曰：

種福九天昇，拔尸地門下，七玄解滯積，斷樹陰憂苦，反胎朱火宮，更生

九玄户，真炁日日臻，禍害日日治，兆昇三清堂，乘鸞上景庭，命與月母俱，年隨日帝生，累玄保仙籍，迴老更童嬰，福昇六合內，受圖永常生。

讀太玄都九炁丈人主仙君道經，當思節中黑炁君斌來生，帝真精魂幽臺王，二神真炁，玉光之色，從兆泥丸中入，下布兆九腸之口伏源之下。畢，微祝曰：

太玄何寥寥，黑炁生上虛，帝真洞明景，九炁合神廬，變化十方頌，倏歛肇明初，萬真鍊我仙，百關自清居，七玄斷胞樹，九曾昇福堂，上招景中子，與我登飛輿。畢，便引玉光三嚙止。便讀玉經，經畢，又祝曰：

帝魂照元阿，常鎮兆生門，伏尸滅落，保魄寧神，玄母迴光，奉帝玉仙，右命太一，乃及兆身，北宴上清，列爲玉寶，命生日華，年合月煙，長濟金房，晨景爲鄰，除憂伏胃門，拔苦三徒中，福積丹玄內，慶充泥丸房，百神混帝一，大變流迴風，反兆朽艾形，改貌爲嬰童，世世入仙堂，玄玄登羽宮，大劫雖

屢傾，與日方增崇。

讀上清八景老君道經，當思胞中黃炁君祖明車、天帝精魂理維藏，二神真炁黃雲之色，從兆泥丸中入，下布兆小腸二孔之本。微祝曰：

上清曜玄堂，八景乘天紀，黃炁協神真，精魂對帝子，太一度命籍，五符固不死，携仙帶晨暉，迴風反形始，拔苦出七祖，同歡九玄裏。畢，引黃雲三嚙止。便讀玉經，經畢，又祝曰：

白雲合晨景，乘素會太微，上朝帝一室，解帶皇一階，啓明金門中，三陽召上歸，昇我身神內，覆蓋太明威，大寶九華，光暎兆形，招雲混真，散香要靈，月中反胎，日中受生，年享曜景，命遂無傾，身爲仙王，保此上清，世受真書，玄華玉庭。

讀青華方諸宮高晨師玉保仙王青童君道經，當思血中赤炁君混離子、司命精魂發紐子，二神真炁如赤雲之色，從兆泥丸中入，下布兆百關結節之下。微祝曰：

晨暉煥東霞，丹景暎高清，二真協

神宗，落落七華生，五老飛帝席，太一保童嬰，錦雲曜幽夜，玄玄開重冥，七祖勒符籍，南極受胎靈，高晨盼雲輿，運我昇飛駟，拔解億世基，歡我萬劫程。畢，引赤雲炁三嚙止，便讀玉經，經畢，又祝曰：

五道混迴，七門始分，南和建節，白帝彰安，靈標理魄，會昌護神，奉符登霄，寢息玉軒，定錄瓊札，世爲天仙，三塗絕破，除伐胞根，死炁沉零，禍輪無連，福臻重枝，慶會華玄，名書玉堂內，世爲道德門。

讀扶桑大帝九老仙皇君道經，當思上玄元父高同生，下玄玄母叔火王、帝皇太一重冥空、九帝尊曰明真，太帝精魂陽堂王、天帝九關魂綠迴道、天紀帝魂照無阿，七神真炁，混合蓮華之形，從兆泥丸中入，下布兆本命之根胞胎大結之中。微祝曰：

元父玄母，七真齊炁，神公太帝，九老并位，爲我固生，拔度十界，日月同符，九帝合契，坐命天魔，萬靈來拜，浮景三舉上，震丈保億世。畢，引蓮花

之炁三嚙止。便讀玉經，經畢，又祝曰：

太玄聚暉，暎冠扶晨，太常變景，須臾混分，入兆五府，堅我玉根，雙駟太一，合羽揚輪，與兆上昇，迴轉金門，年同日德，體寶金仙，世世昌盛，真符流連，玄玄累葉，名書靈軒，羽籍紫庭，飛香奏煙，福逮百枝，慶溢帝門。

讀小有玉真萬華先生主圖玉君道經，當思三素老君牢張上、正一左仙仲成子、右仙曲文子，三神真炁，混合黃白玄三色之雲，從兆泥丸中入，共下布兆鼻下人中。微祝曰：

玉真生帝景，萬華乘雲發，三老輔二仙，共鎮死戶窟，神暎七華生，朽骨蒙更蛻，超逸三界庭，五苦咸解脫，得入九天表，上朗高朱日。畢，引三色之雲三嚙止。便讀玉經，經畢，又微祝曰：

命門合精，六混七分，太一把籍，司命理神，帝一固形，無英守魂，太迴紫房，奉符帝君，胞樹伐滅，斷絕血根，七玄更起，沉景生煙，兆得上昇，化合

帝晨，身映日月，命與天連，重華累暉，咸會上尊，世書靈羽，紫錄內宣，乘景三素，北宴高元，號曰仙王，上清真人。

讀玄州二十九真伯上帝司禁君道經，當思中央玄一老子林虛夫真炁，黃雲之色，布兆陰莖之端；北方黑帝保成曷真之炁，玄雲之色，布兆膀胱之中；西方白帝彰安幸真炁，素雲之色，布兆陰囊之中；南方赤帝長來覺真炁，絳雲之色，布兆口舌之中；東方青帝彫梁際真炁，青雲之色，布兆五藏內。五帝真炁從兆泥丸中入，下布一身。畢，微祝曰：

五帝明真，輔仙玄伯，上帝景暉，吐靈敷席，翳翳神曜，徘徊重幕，羽景保錄，太一命籍，五炁總魂，三精固魄，金仙鍊容，停年返白，拔出幽根，日月同宅。畢，引五色炁五嚙止。便讀玉經，經畢，又祝曰：

上寶月九真，日曦變玉室，呼吸紫微，大混帝一，八煙叢生，百靈明威，九魂離合，三光同暉，天皇在元，紫煙霏霏，五神奉圖，始命不虧，變入九宮，被

服朱衣，腰佩虎章，流雲繡帔，帷帳瓌玕，五色徘徊，日月照察，俠以東西，神庭內醴，以除渴飢，三五復返，轉藏營機，周流太一，生均兩儀。

玉清隱文又祝曰：

太一變六合，五神哺泥丸，七積滅三塗，血尸塞下關，三衿對帝真，拔斫胞樹根，丈人號神宗，同心元素君，天皇入太清，五老奉符文，世世登羽宮，重華日中軒，元王始明精，固我本命門，保弼運綠炁，歸上谷下玄，玄景暎形神，朝躋太上輪，日月併玉衿，年隨二景分，丹書玉堂內，位爲天上君，左携羽臺子，右提金顏仙。

讀太無晨中君刊娥眉山中洞宮玉戶太素君道經，當思帝卿肇勒精、絳宮中一卿中光堅、下黃庭弼卿歸上明、三神真炁，混合青白黃三色之雲，從兆泥丸中入，下布兆身三宮本命帝室。畢，微祝曰：

三真生太無，玉戶暎晨霞，太素洞元虛，丹靈森朱阿，迴神九重府，內唱發瓊華，百關納津液，停年三秀柯，我

身騰玉清，七祖離幽都，長保不終劫，萬世承仙家。畢，引三色雲炁三嚙止。便讀玉經，經畢，又祝曰：

帝一混九玄，太素五華精，寶羽宴

玉堂，八風扇太明，高上乘元景，凌梵履昌靈，七化紫房下，九混五帝清，體生六色曜，金暎流神形，感濯元炁內，金書玉皇庭。

玉清隱文又祝曰：

靈雲始分，白炁鬱素，混會九玄，三五流布，帝一解形，超登霄路，太一呼吸，五華堅固，司命主日中，白元司月夜，日中靜心，心玄妙悟，夕隱泥丸，百神宣布，二宮可以長生，心腦可以長度。

讀西元龜山九靈真仙母青金丹皇君道經，當思大洞帝一尊君父寧在真炁，五色紫雲之煙，從兆泥丸中入，下布一形之內，散炁九孔之中。畢，微祝曰：

九靈通妙化，金仙混扶桑，帝一變百神，合靈西丹皇，上爲胎仙母，下號稱神宗，曜景絕雲杪，蕭蕭紫微宮，爲

我執命籍，保真三素房，妙景空中降，鍊我反嬰蒙，七祖絕苦源，逸超九福堂。畢，引紫雲三嚙止。便讀玉經，畢，又祝曰：

太上洞明，飛景九元，結精凝炁，化炁變神，司命混合，散形億分，千乘火甲，萬騎揚幡，俱與太一，上造帝仙，伯无起律，仲成曲文，一合我炁，再合我神，三合我魄，四合我魂，五合我精，六合我身，我身六合，洞靈啓真，八景虛駕，三素浮輪，我與帝一，俱昇玉晨，重華累枝，混會天仙，身有道籍，世有生根，金簡羽符，名刊日軒，所願即從，天祿誦誦，所向如心，萬福盈門，常存太上，帝一泥丸，雌雄混化，百靈纏綿，讀經萬徧，雲駕來延，携宴五帝，日月九君，號爲仙翁，上清真人。

大洞玉清隱祝九天上文，出自高上口訣，解滯散怨，大洞真經三十九章，理極於此。上則引致高靈之霞暎，下則滅於萬魔之凶殃。出祕要四十二陽字號。誦之一徧，開明幽關三十九戶，納受玉津，死炁沉塞，百神內歡，百神既

暢，則聲達九玄，炁朗紫霄，響叩玉晨，五帝束帶，萬靈朝軒，生生來歸，七祖昇遷，身致羽翼，駕景乘雲，飛行玉清，位齊紫寶，此高玄之妙道，玉清之祕篇。出祕要四十二陽字。皆授金名玉字，高仙真人。七百年中，有合此質，聽得一傳。

後聖曰：得受大洞真經三十九章，修行之日，當先行大洞之儀格，誦玉清隱祝之文，又存思百神內名，外則過於萬試，內則塞於死關。如此一徧，便得一日一夜。單誦三十九章，不煩徧徧依舊行其儀軌也。若明日又登齋誦經者，當更按舊一過行之。

凡欲遊行五嶽，歷觀羣山，留命停白，保壽劫年，未欲飛騰遠離世間者，便可以太歲、本命、八節之日，單誦玉清隱祝，內思百神一徧，不須誦玉經也。如此百徧，則炁參晨霄，百神內纏。千徧，三元下降，刻名帝篇，長保日月，天地齊年。萬徧道備，乘雲駕龍，遊行太虛，領括羣仙。此道高妙，慎宣非真。

九天玉清紫文丹章綠字隱文

肩 五 弱 功 齋
厥 弱 功 純 功
唐 志 志 志 志
慈 危 志 志 弱
重 經 三 功 齋
赫 危 功 四 功
赫 危 功 齋 齋
順 功 功 齋 齋

齋 齋 齋 齋 齋
齋 齋 齋 齋 齋
齋 齋 齋 齋 齋
齋 齋 齋 齋 齋
齋 齋 齋 齋 齋
齋 齋 齋 齋 齋
齋 齋 齋 齋 齋
齋 齋 齋 齋 齋
齋 齋 齋 齋 齋
齋 齋 齋 齋 齋

垂 劫 乘 空 垂
 弄 垂 經 通 垂
 請 逐 在 空 將
 道 皇 秋 豔 蕊
 危 乘 階 奕 奕
 恠 崇 齋 皇 迹
 我 務 致 致 務

紫文丹章綠字隱文，一百二十言，乃九天之上炁，凝紫暉之精，結成自然之章，表見玉清宮中。其文煥曜，照明上清，致高上注筆，通其隱音，以綱維玉處，制命九天，匡御威神，召真檢靈。

即元始天王所佩，以傳玉清帝君消魔大王、玉清神霄王等，侍文玉童玉女各二十四人，糾於漏慢，營衛佩文者身。得佩此文，則與九天齊真，名書丹臺，位准高玄，身發紫光，項負圓明，遊行太虛，十界司迎，致三元下降，同宴霄軒。修行神仙之道，披誦高上玉清隱書大洞真經，當安身方丈之上，心暎紫文丹章，左把流金火鈴，右御豁落七元，則玉虛不招而自降，大洞不叩而發關，萬真應機而感會，羣魔束身而自亡，運策八炁，迴轉五辰，坐命萬靈，役御羣仙，炁合高虛，形齊紫寶。九天之祕奧，玉清之隱文，有泄此章，身被風刀，責及七玄，生死之考，一如九天盟文。

有金名玉字，列圖九天，得見此文，當以絳紋之繒三尺為地，以紫筆書丹章於繒上，賚紫紋九十尺，金魚玉龍，詣師清齋九十日，北向告盟九天而傳。弟子受以錦囊，佩之當心也。得佩紫文丹章，皆位准高玄，得受玉清隱書，位准太真，坐起寢息，皆與玉虛交

纏，玉華衛真於左右，五帝髣髴於寢軒。不得雜同於常俗，混穢於高真也。犯則神逝而魔前，被拷而失仙矣。

佩紫文丹章，出入卧息，乃行道之際，恒當先思己身有紫暉之光，玄覆於上，炁繞一身，便叩齒九通而祝曰：

玉虛九重，紫暉八纏，玄光重暎，玉清吐津，紫文丹書，表明九天，制命萬靈，招役羣仙，威攝萬萬，檢翦千千，影響立會，五雲發煙，飛輿紫蓋，倏忽來前，使我乘空，高登玉晨。

畢，便引紫炁十二嘯止。如此九年，即有紫雲之蓋暎覆兆身，身生紫光，照明十方，通神致真，洞觀太虛也。昔上元夫人以隱文授太和玉女，太和玉女授幼陽君，陽君道成昇虛，以文封於九嶷洞室，七百年當授合真通玄之人。後學精念，自當感會預有緣也。

上清太上玉清隱書滅魔神慧高玄真經

釋音

擻音竅。嶠元俱切。畿渠希切。攄音
 樗。參差上疏臻切，下又宜切。杪音眇。罷班
 糜切。晶音皎。弁衣檢切。降伏上音杭。斌
 紐民切。巾金上音斬。三便下平聲。昱音育。
 冪莫狄切。

①「曲」原作「典」。

上清高上滅魔玉帝神慧玉 清隱書經

高上玉清刻石隱銘內文

上清高上刻石內文，玉清上宮北
 壁隱書鬼神內銘，高上玉帝以傳太微
 天帝君。三道立正，太微天帝君以授
 後聖太平道君，以刻書酆都六宮，下制
 北帝酆都之山。道君書其文，備遊十
 天，召神滅魔，威伏萬精，封檢五嶽，束
 縛羣靈，上披天關，迴轉五星，縱景萬
 變，真光洞明，流金交換，十天鬱冥，欲
 殺者殺，欲戮者戮，適意所造，平斷死
 生。其道嚴妙，玉帝之精，有見其文，
 不學立成，北酆落死，青華記名，真仙
 來朝，上造王庭。玉清隱書，玄旨秀
 靈，瓊音洞微，妙趣明徹，八電激威，制
 靈使氣，策召璇璣，輪轉五辰，七星奔
 移，坐命九天，萬神總歸，玉司浮位，二
 景停暉，千精伏竄，羣魔滅摧，詠其辭
 則天關洞開，說其呪則萬真解懷，紫霞

流暎，金仙侍靈，天元敷庭，八風肅清，
 玄光冥滯，三景合明，天淵靜波，巨虬
 嚴征，神虎振威，毒獸羅兵，斬馘不祥，
 妖魔伏形，萬萬受事，千千皆平，五通
 七合，三氣齊并。子有玉骨，當尋寶
 經，勤心苦行，尅造雲營，上之玄宮，朝
 謁三清。

酆都山在北方癸地，山高三千六
 百里，周迴三萬里。其山洞天在山高
 下，周迴一萬五千里，其上下并有鬼神
 宮室，山上有六宮，洞中又有六宮，一
 宮輒周迴千里。是為六天鬼神之宮，
 二處合一十二宮，上宮主鬼，洞中主
 神，生死之所由名簿，悉隸北帝君也。

玉清刻石隱銘內文二篇，一篇制
 鬼，一篇檢神。十二宮北壁，輒刻一篇
 隱銘內文也。

第一宮名紂絕陰天宮，第二宮名
 泰殺諒事宗天宮，第三宮名明晨耐犯
 武城天宮，第四宮名恬照罪氣天宮，第
 五宮名宗靈七非天宮，第六宮名敢司
 連宛屢天宮。

右六宮治酆都山上，主領萬鬼，總

統地上人民之死生。玉帝刻石隱銘，以書宮北壁，制檢羣凶，不使橫暴，枉害生民。學者得佩此文，則萬鬼衛身，北酆落名，度命南宮，得爲真人也。

酆都山洞中六宮，主領萬神玉帝隱銘刻名文，書宮北壁，以制六宮萬神之靈。

第一宮名休明總靈洞天宮，第二宮名玄司重正宗虛天宮，第三宮名統仙升靈希微天宮，第四宮名正真邵靈宛司天宮，第五宮名雲樓玉紀明朗天宮，第六宮名崇虛赤暎雲由天宮。

右酆都山洞中宮名，總領萬神，生死簿錄，莫不係之。若有知洞中六宮之名，佩玉帝隱文，南神內朝，不復害人，北酆落除死日，度名南宮，真神衛從，白日昇天。

顏 彘 款 龍 靈 龍
魁 泮 紇 精 汨 樊
涿 剋 北 龍 山 丞

靈 燕 函 翕 弄 平
泮 源 凶 泐 熱 厥
以 古 邪 宮 嘉 風
善 采 隋 蕪 崩 弱
豎 凡 凡 凡 怒 物
牲 秘 泰 焉 還 牒
宕 耕 歪 坐 彘 鳳
三 虫 彘 駟 也 凡
隱 銘 言 豎 夜 仙

凡 乖 翎 陶 輝 韻
豎 邪

右玉清刻石隱文，以朱書青繒三尺佩之，兼青書所住北壁，出入行來，遠近萬鬼朝己，千鬼衛真。此玄古之道，玉清隱文，得者神仙，不復隸於酆都之宮。受者祕之，慎勿示人。有金骨玉名，名參青宮，得此文，當依玄科，七百年內聽得三傳。傳非其人，北帝爲所奏，殃延七祖，長充鬼責，身沒形殘，萬不得仙。

六 豎 歪 邪 古 崗
豎 霜 豎 豎 崇 崩
典 建 正 勃 川 務

與罷願聖聖
 與深高言夢素
 與本率朋敵
 此起陽精魁
 此可流精理
 燃垂下益出
 中錄息聚迷肩
 刻此高體
 起流芻飭

彈犇
 刺處
 此教
 此

右玉清刻石隱文內銘，凡九十一言，玉帝刻書艷都洞天六宮北壁，以檢制萬神。若有玉骨，名書紫清，得遇此文，當以朱書青繒三尺佩之，又朱書所住北壁，則真仙下降，萬靈衛形，千妖伏竄，天魔喪精，威制十天，總統衆生，縱景變體，萬化立成，乘空駕浮，飛行玉清。輕泄寶文，殃連七玄，身沒鬼官，永不得仙。

凡受玉清隱文洞景金玄之章，誦詠萬遍，常呼艷都上下六宮名萬徧，自當洞解刻石隱名。此音發於高上玉虛之天，自然之篇，皆著天魔內名，或表九天玉章，其辭幽遠，非始學凡夫所可意通。自非大帝下降，坐致瓊軒，參晨

乘雲，駕浮洛景紫天，不得諳究此銘。後學有心者，得見此篇，皆東華書名，骨相合仙，天真降感，故受此文。但當依法佩身，以却萬靈，道滿氣澄，必得洞覽隱音，遊行玉清也。

凡受玉清隱書洞景金玄之章，而无玉帝刻石隱銘內文，皆不得誦詠金玄之章。輕誦駭動高上，萬魔乘機而生。徒有隱銘內文，而不受洞景金玄，亦无以制魔。上下相部，二用齊并，三景合契，萬氣肅清。《金根經》言：凡修大洞，當坐震靈；凡修金玄，當佩隱銘。其道至妙，藏於玉虛九曲之房，金神侍衛，玉華執巾，三十六真典領玉篇，違科犯禁，列奏三清，身沒鬼官，長責幽泉，天科重告，慎勿妄宣。

凡受玉清隱書刻石內銘，皆先清齋七日，齋竟，然後賫錦繒三十尺，金環九雙，告北帝而盟，跪誓而傳。長齋之士，絕交人間，身不染穢，體清氣澄，乃得修行行此道。太一監試，司命定生，玄感妙告，上徹玉清，帝君懽悅，羣真詣庭，萬遍道備，尅乘綠輶，參駕玄


浮，上造帝庭。

高上滅魔殺鬼上法

甲乙日殺鬼都伯吏，姓宋，名巨暎，主領甲乙日萬鬼目錄。丙丁日殺鬼都伯吏，姓友簡，諱法生，主領丙丁日萬鬼目錄。戊己日殺鬼都伯吏，姓黃，諱安正理，主領戊己日萬鬼目錄。庚辛日殺鬼都伯吏，姓帛，諱西子留，主領庚辛日萬鬼目錄。壬癸日殺鬼都伯吏，姓鄭，諱玄丘伯，主領壬癸日萬鬼目錄。

玉帝曰：此五帝殺鬼都伯吏，皆受北帝清虛之號，雖為領殺鬼之主，至於階級，亦不為輕，乃五嶽所宗奉，學者所仰憑也。其例二千四百年，皆轉升玉清，為總仙之官也。學者不知伯吏內名，又無殺鬼玉文，鬼魔莫不干試，毀其仙正也。諸以北帝萬鬼，天下羣魔，及苦爽未升者，名隸北酆，悉總主之，有知其名，則勤錄九天，萬魔滅凶，羣鬼匿爽，將無復試敗之患，必自

然成真也。然此高上所祕，藏之於瑤臺，不傳於下世。輕泄者沒身負風刀之考，七祖受罰於濛山也。



此神吏，七寶間翠元冠，碧玉簪，金華翠緣，紫綃之服，白綬，絳裙，朱履，紅繡窄衣，執紫幡五色。

北帝寒靈滅魔殺鬼玉文，受之於高上三天，衛以玉女三十六人，一名九天命靈文，高上神霄王所佩，欲殺甲乙日鬼，當朱書文白奏〔上〕，長一尺二寸，廣三寸二分，置西方庚上，乙日辛上，閉氣七息，叩左齒三十六通，呪曰：

乘天履氣，奉行威章，高上玉文，

普攝萬凶，寒靈受制，嚴如天鐘，明告伯吏，檢制北酆，先戮鬼爽，後剪魔王，大小滅種，高下摧崩，如天之命，絕氣火宮，太一監詔，五老促翁，天清地朗，萬津開通，甲乙所執，靡不敬從。畢，引氣七咽止。行此七日，天魔束形見景，受事於眼前，鬼爽滅種，萬精自亡，朱書白素佩身，可遊行天下，羣妖試滅，萬鬼不敢干也，役使太丹玉女八人。



此神吏，金華綠絳綃之服，黃裙，青羅窄衣，綬帶冠履同前。

北帝丹靈滅魔殺鬼玉文，受於高上三天，衛以朱宮玉女六十四人，一名攝殺律，高上消魔王所佩。欲殺丙丁

日鬼，當黃書文黑奏上，長一尺二寸，廣三寸二分，置北方壬上，丁日置癸上，閉氣五息，叩齒三十六通，呪曰：

高上告命，普攝萬靈，伯吏受符，校案玉清，檢督北酆，條送魔名，上帝所須，无虧時呈，皇老監詔，五仙部兵，天一秉鉞，斬滅無停，萬萬伏法，千千戮形，殺律所攝，莫不悉清。畢，引氣五咽止。行之五日，鬼魔皆束形露景，受事於眼前，萬凶滅跡，千精自喪，黃書玄繒佩身，遊行天下，萬妖滅凶，羣靈不敢干也。五年自得役使黃素玉女十二人。



此神吏，金華皂緣，紫綃之服，絳裙，黃錦窄衣，綬帶冠履同前。

北帝素靈滅魔殺鬼玉文，受之於高上三天，衛以素靈玉女三十六人，一名九天兵信，玉清玉霄王所佩。欲殺庚辛日鬼，當黑〔書〕丹奏上，長一尺二寸，廣三寸二分，置南方丙上，辛日置丁上，閉氣三息，叩左齒三十六通，呪曰：

天開地通，玄氣朗清，掃除浮翳，五道煥明，奉帝詔命，檢校萬靈，北酆所部，嚴束正形，高上所攝，促氣時呈，羣魔自到，鬼爽滅精，風發電激，自天肅平，皆如玄符，伏法帝庭。畢，引氣三咽止。行之三日，鬼魔皆束形見景，受事於眼前，萬魔伏法，羣凶滅跡也。黑書丹文上佩身，遊行天下，萬魔竄伏，群靈不敢干。三年自得役使太玄玉女五人。

此神吏，金華綠緣，絳綃之服，皂緣，紅裙，青羅窄衣，綬帶冠履同前。




北帝威靈滅魔殺鬼玉文，受之於高上三天，衛以太玄玉女二十五人，一名威神玉策，玉清消魔王所佩。欲殺壬癸日鬼，當青書黃〔奏〕上，長一尺二寸，廣三寸二分，置中央戊上，癸日置己上，閉氣十二息，叩齒三十六通，呪曰：

天摧地激，四時攝光，五行促校，檢定十方，天帝浮位，皇老出房，高上所討，嚴剪无容，先戮鬼爽，後截羣凶，千妖萬試，莫不伏降，皆如玉文，流鈴八衝，豁落交擲，山嶽摧崩，承天順命，伯吏齊功。畢，引氣十二咽止。行之十二日，鬼魔束形，皆見景受事於眼前，萬魔滅種，羣妖喪精，青書黃繒上佩身，遊行天下，萬鬼自竄，千妖匿景。

此神吏，金華皂緣，紫綃之服，絳裙，黃錦窄衣，綬帶冠履同前。

此神吏，金華皂緣，紫綃之服，絳裙，黃錦窄衣，綬帶冠履同前。

十二年，自得役使青腰玉女九人。



此神吏，金華翠緣，朱羅之服，紅綠絳裙，白繡窄衣，綬帶冠履同前。

北帝洞靈滅魔殺鬼玉文，受之於高上三天，衛以黃素玉女十二人，一名黃神威靈策，高上玉帝君所佩。欲殺戊己日鬼，當白書青奏上，長一尺二寸，廣三寸二分，置東方甲上，己日置乙上，閉氣九息，叩左齒三十六通，呪曰：

黃中理氣，制命九天，三靈應符，五老校仙，促檢北帝，束送魔身，羣凶瞽目，不得推遷，上帝所告，捕追无親，敢有越逸，急制艷山，明如帝信，上對

玉晨。畢，引氣九咽止。行之九日，鬼魔束形見景，受事於眼前，萬魔滅種，羣妖喪精。白書青繒上佩身，遊行天下，萬鬼伏竄，千妖匿景，不敢干犯。九年自得役使素靈玉女七人。

玉帝曰：殺鬼玉文，出自九天隱空之中，高上以付殺鬼都吏，以制御萬魔，剪滅羣凶。如消魔王、神霄王等，皆受之於高上神慧祕呪，自玉清中之微辭。凡學仙之夫，遊行名山，經歷險阻，皆當依具施行。又登齋誦經，修求飛騰之道，亦案其施之，以遏鬼試。若在人多鬼之處，亦當施之，以滅鬼妖也。若行此之道，皆當精心苦誠，執志審固，无有疑預，如法計日，天魔无不露形伏法。若萬一不見真形者，便是己身自履穢未消，雖爾鬼魔亦於冥內受形於伯吏也。若浮好之士，身不精感，輕施召鬼，鬼反害於己，便受大殃也。明慎之，勿輕脫也。

玉清神霄王曰：凡鬼魔巧便，變化萬端，或沉或浮，或見或亡，或聚或隱，或藏或形，或氣或死或生，或飛雲

中，或治空洞，五色恍惚，无有常形，如此皆承六天之運，受會於三天，在其度之內，故得肆其凶醜。高上亦以後學多巧，民心不純，洎害繁生，惡逆滋彰，故容之以威民，使協真以罰非，役之以兼考官，故不滅其根種也。若使運終數訖，則其氣自消，民心自然而純學者，自然成仙也。今鬼之爲物，貪濁无廉，因威生凶，干試後學，无復有真，皆九天逆明其象，故置五帝殺鬼玉文，以檢截其凶橫也。若後學得此文，將鬼魔自滅，其凶試不干也。九天禁限，依四極明科，七百年中有其人，聽三傳。輕泄漏慢，身受大殃，宜詳慎奉行。

高上消魔王曰：凡上真已成真人，猶凶魔所試，何況凡學之夫耶。仙道不成，亦不被試者，皆是九天制魔保舉，故魔宜先試其邪正也。得魔保舉，便白日昇天，豈可爲咎魔也。但魔所試，其欲令敗，不欲使過，故高上明其凶橫，置於殺鬼玉文，滅魔之章，及玉帝神慧，皆以防滅此橫也。若使其干試以理者，亦當不須又消滅之方也。

後學故宜勤修，施行玉文，及誦玉帝神慧，以禳此灾也。自非受氣玉虛，結秀瓊胎者，空身而求肉飛之舉，无有此文，自勞鬼於疲曳，无獲於圖尚也。

高上九天驅除邪精神慧上法

上清隱玄玉帝大慧，一名九天驅除神呪內法。此之經文，皆虛皇之上道，高上所神祕，攝靈命真，滅魔總慧，振六天，招衛神兵，摧落姦妖，伐戮邪精，蓋玉帝大試之時，正立三天之法也。瓊音既震，則凶穢消除，山精殘滅，萬靈受事，神真輔衛，九魔伏形，寒靈失氣，天鋒仰曜，神威俯攝，辟毒禳試，萬妖滅跡。此法至不可輕泄，傳授之者，皆立盟爲誓，約不宣漏。若違盟負誓，不崇科禁者，身爲下鬼長閉地獄，七玄之祖受風刀考罰矣。

九天玉帝神呪曰：九天上化，化道常生，保景太无，寢暎朱瓊，逸宅丹玄，受事玉清，十轉九過，七混五成，神暉赫曜，振策皇庭，道達三變，錄神命

靈，玉帝散慧，隱玄羽經，千真傾輪，五皇命征，披朱巾羽，森列帝庭，左佩神虎，右策金兵，九天征伐，煥擲火鈴，滅魔破妖，剪邪校精，風火奕震，六天摧傾，豁落北酆，九魔塞靈，逆道者誅，順化者生，上帝委命，勅衛神兵，千邪滅試，萬鬼无停，敢試有干，一付天丁，有妖則滅，有毒則刑，既滅既刑，攝邪錄精，六天已誅，威震七靈，寶神驅穢，霄浪三清，萬真受事，俱會帝庭，六象調和，七晨暉明，神風散魔，道暢无名，神慧滅魔，玉帝呪生，九天垂命，攝真御靈，請奉皇命，仙道乃明。呪畢，又叩齒三十六通，咽液十過。於是乃寢，都畢也。

若道士他行獨宿，及有心震之地，或於林廟之間，多有山精惡鬼，喜來犯試於人，心神畏恐者，當誦玉帝神呪之法，以禳辟之。靈音既震，則天魔滅試，萬邪竄迹，神真營衛。若與萬人同宿，是夕也，當有靈應妙覺，神兵見衛，伐戮姦妖，驅滅凶穢，三宮受真，五帝輔弼，內填靈闕，外威賊氣，於是神清

體平，都无所畏矣。

玉帝呪鬼衛靈上法

玉帝呪曰：九天有命，上奉玉清，促召千真，俱會帝庭，太一下觀，雙皇翼形，鑑察萬邪，理氣攝生，若有不祥，干試神明，請帝之道，勅整神兵，七神秉鉞，天鋒右征，揮劍前驅，煥擲火鈴，檄命甲騎，武卒天丁，風火齊戰，伐邪校精，上威六天，下攝魔靈，既威既攝，萬凶滅形，神戈電掃，姦妖无生，仙皇秉節，有令敢停，拒節違令，是誅是刑，各敬各慎，保茲黃寧，九天告命，萬神敬聽。

兆若夜行畏恐，心震意怯，或惡夢之時，魔鬼試人，犯真干氣，欲病害人者，急行玉帝衛靈之法。兆當心存至道，求濟於帝方，北向叩齒三十六通，閉氣密呪畢，又叩齒如上十過，咽液十過。於是姦惡消摧，伏魔伏滅，七神纏綿，太一鑑攝，萬靈衛真，外威凶氣，亦可日日誦習，振響誦念，坐卧隨意，以塞百邪之來試，閉姦鬼之凶跡。每當卧寢，亦可誦之，今人神安意明，辟夢

除厭，消諸毒惡，使終身不恐。誦習之日，不復北向閉氣也。所以閉氣密呪者，謂鬼魔已試其左右，姦精已干其神室，故敕靈命真，以收其凶惡耳。而寢卧之呪，不復同之於此法也。

上清高上滅魔玉帝神慧玉清隱書經

①「上」字原缺，據文義補。後文凡方括號中缺文，均據文義補。

上清高上滅魔洞景金元玉清隱書經

太微天帝君，閒居於明霞之上，瓊闕之內金華之房，合變冥樞蕭朗上契曲寢瑶室，時宴龍山，清齋三年，乃命太素三元上皇五賢之賓，檄落萬靈，理召千真，九天齊陳，八帝停輪，披朱見於玉戶，陰甲列於瓊門。爰有九皇上真上元禁君，超玉虛之天，啓五真之房，帶逸錄之符，乘三素之駟，上詣玉清太微天帝君，顯靈蓋而後乘焉。是時玄始暎朗，天元敷陳，河海靜波，八風散煙，慶雲接於龍軒，景浮揚於九玄，金仙秉鉞，大師伏幡，天丁前驅，高鋒厲天，九靈啓路，四明扶輪，飛旌萬塗，羅騎億千，躑躅於瓊闕之下，揚華於明霞之巔，靈儀闡備，莫不畢陳。於是太微天帝君方復曲宴瓊室，重誦洞章，歌紫虛之靈辭，琅微音於七玄。于時乃命太微上真，勅使羣靈整甲齊鋒，乃登八瓊玉輦，駕玄景之暉，太霞部

靈，引日挾月，七晨合明，上星驅除，火甲揚精，八素啓輿，元剛衛兵，羽蓋停空，萬騎相傾，毒龍翼軒，飛煙繞駟，戴玄上之華幡，煥流金之火鈴，五霞陳曜，六度休明，撫九華之鳴鐘，打碧鼓之玄英，撞金折玉，叩璈拍瓊，龍吟虎嘯，鸞舞鳳鳴，八音同和，萬律齊聲，雲璈絕玄，天女羅箏，法響時奏，續節上呈，天鈞四陳，廣樂虛庭，神虎仰號，天獸羅兵，逆鱗四喉，振豪奮形，銜刀割魔，揮劍捕靈，伺六天之凶夫，斬山嶽之邪精，羽騎浮空，神鋒曜明，揮輪玉字，揚華上清，望雲景而徊輦，逐傾蓋於霞城。既至良久，於是上皇玉帝君，乃命玄羽玉郎太保真人，出迎太微天帝君，徐引使前，遂盼於瓊房焉。太微天帝君，乃稽首伏於窗軒之下，進拜於帝皇之机，憑瓊顏而妙感，仰靈眸而陳辭曰：

賤臣幸化，重悟凝玄，得司帝位，領括羣真，浪虛津於七覺，遂鳴玉於霄上，希清玄之神塗，想玉虛之神王，實亦妙眇於玄流，奏冥心於遐方，而天尊

高秀，靈蓋顯照，垂觀下流，已弘大恩矣。

於是上皇玉帝君，乃推机偃詠，虛眺太空，吟玉清之隱書，歌元景之靈章，玉音遐璨，清微琅振。其辭曰：

上景發晨暉，金霄鬱紫清。三素曜瓊扉，玄上照虛靈。手掇青林華，迴蓋太无庭。寢宴頤綠房，飛步秀玉京。提携朱景玉，長煙亂虛營。玄歸自可保，何以怨无生。四王宅誰身，變分豈一形。欸欸推妙品，混爾至氣明。

於是玉帝吟歌畢，乃命太微天帝君，使坐引萬靈於房軒，散華香於玉宇，陳天鈞之廣樂，響靈音於八海，振冥波於天外，鼓扇乘風，千神羽衛，方酌玉爵，盼於瓊華之房，九英稊薦，素實丹方，隱芝結饌，鳳俎月漿，玉攝重奏，玄羽運觴，流連於八瓊之室，曲宴於九琳之堂。於是上皇玉帝君，方凝神遐想，高詠絕玄，忽然而歎曰：上契玄範，通達冲微，亦深矣哉。子既司帝位，受事玉虛，飛仙朝於金闕，四明輔於輪側，遐盼空山，領括天嶽，應和絕

唱，據讚妙慧，誠宜極觀幽文，冲契上法，高會秀感，其勉之乎。乃命上皇太老真人，開瓊珠之篋，出玉清隱書隱玄羽經，以傳太微天帝君。於是帝君下席，稽辭於上皇之前，再拜受書，出付太微上真羽玄玉郎，以授諸上清真人，及太素三元高上玉賢之賓。又帝君領括衆天，試觀十方諸有宿命之人，真仙之會及有帝簡金書，百玉錄籍之名者，乃得授傳之耳。侍書玉童玉女各四十五人，主司有經者之身，糺罪於司命，紀過於三元。密慎者則享福，漏泄者則禍纏，苦樂立應於七祖，罪福交會於當年。三天司察，奏之帝君，書罪錄過，无不上聞，善惡違情，可不慎焉。

上皇玉慧玉清隱書者，乃高上之訣辭，玉帝之靈章也。一名洞景金玄隱玄羽經。玉帝君藏經於景雲之闕瓊霞之房，封以丹藥之篋，闕以雲錦之囊，主以太老上真，侍以玄景玉童。使七百年中，得傳三人。自非真仙之名，帝圖玉錄者，不得聞見此經。得見之者，飛仙上清。傳授之法，皆五老授

圖，太一試觀，故能攝生十方，領會洞天，啓誓丹青，歃血爲盟。先齋七百日，然後傳之。盟用青錦三十尺，金環兩雙，所以重誓冥科，崇約帝君，上登玉清，累祖胎仙。漏泄寶文，七世被殃，繫魂鬼於死户之下，伐年命於五道之津，三官考毒，已無仙冀，切身殊於水火，嶮巖過於履冰，可不慎哉，可不慎哉。

玉清隱書金玄羽經，皆虛皇之寶書，玉帝所祕藏，三天司察，糺諸違慢之罪。兆登齋之日，侍經玉童玉女上聞帝君。靈音既震，則太一鑿試，帝尊下觀，太老侍側，羽仙司真矣。兆當清齋入室，淨服燒香，唯精唯專，然後乃十轉誦經耳。

洞景金玄玉清隱書

玄玄虛上，四靈敷篇，玉慧散魔，六度休陳，高會三元，朝宴九真，萬靈受事，玉帝隱玄，九和百會，衆乘法輪，流浪高軒，立景上元，道逵无方，體一

凝神，冲化合變，七道齊分，保生玉清，逍遙虛津，陰察萬兆，括領洞天，巍巍德宇，峨峨高尊，雙景翼靈，四映二玄，五道交煥，萬範流全，周落天度，七變九旋，觀化太空，飛步玉宸，清波遠鏡，道悟上真，精微太虛，高唱絕玄，於是八素同期，俱朝玉清，檄命太微，徵召萬靈，三元奏簡，五老會庭，高真森羅，金仙殊形，羽裙玉袂，錦帔流鈴，綠霞被素，玉室發精，音響太和，萬唱絕冥，靈光八暉，七氣混生，公子合變，帝一凝形，妙詠神慧，玉道隱經，靈音瓊散，玄響續呈，五皇命駕，高秀皇庭，玄上招仙，玉帝之旌，五嶽神王，輔輪四明，二道方塗，理會上仙，洞天高觀，妙景雲京，天扉廓散，靈禁開明，騰舞太无，七神常生，雙宴空洞，遊夢上清，精感遠暢，道合无名，十絕交和，二象虛停，攝元理氣，萬化渾成，錄簡雲房，寶籍高靈，澄神紫虛，命胡可傾。或乃神元妙接，逸觀常流，四玄總暎，飛光電幽，日華雙運，紫庭照軀，道悟上真，七靈同符，神機穎速，八皇定書，名奏帝堂，

羽籍太无，身宴錄房，飛行玉虛，南宮受仙，七元反胎，寢暎高瓊，變升神衢，霄歌玄唱，帝賓同居，保茲玄歸，丹皇運珠，上一赤子，凝天伯无，妙眇雲景，鬱鬱雲丘，手排金扉，身荷玉符，朱霄霞煥，八光仰投，體矯冥真，攝生萬流，保景金晨，長宴玉州。於是罪滅三塗，靈吹九辰，納真紫房，五皇携仙，保會絳宮，逸宅丹玄，十轉五迴，靈震萬原，香風八披，惡魔絕煙，萬萬千千，來對帝前，仙皇告符，道達三真，瓊音上充，七世无間，令我飛仙，名遷玉門，三氣纏綿，九魂已分，帝一變景，萬化亦臻，七度上徊，三光暎真，對滅五道，伐破胞根，雙皇俠守，把符十玄，玉籍已明，福盈龍泉，陵梵履昌，五氣合延，參乘太一，同昇帝軒，并命公子，奉籍七神，黃錄刻名，握節上遷，飛暎玉華，煥落靈元，滅魔散禍，長閉帝宮，玄氣四霏，大混虛冲，靈飛外輔，六丁注中，雲行雨施，流布三宮，九皇下視，上策隱龍，月母同軒，徊蓋帝墟，披朱巾羽，鳴鈴華峰，越出地戶，泉曲之梁，五老合符，

徊金帝鄉，俱過水火，混一紫房，七開受仙，朝會玉堂，九曜同生，五華運光，八氣慶合，十絕牢張，上帝歡熙，玄母常康，九靈同期，左弼右卿，太无結暎，萬氣混并，上登洞房，徊合玉清，神風扇扉，紫霞綠經，鬱洞靈機，九和百明，神對金霄，逸羽龍京，景福萬塗，七祖順生，各保南仙，莫不胎嬰，九合三離，素華繞形，福景日王，併羽月靈，太一召魔，九天校精，拔迴死積，越度仙庭，司命奏籍，帝一混并，三元把符，七神虛營，穢氣紛紛，血尸沉零，絕根反胎，萬氣以成，太素錄圖，金仙同輯，大福纏綿，累支同榮，寶藏秀華，三關霄清，白氣徘徊，凝鬱珠瓊，飛浪玉晨，長保劫齡，五暎纏曜，七門受明，神符散慧，理氣攝靈，右徊洞陽，左携无英，公子奉籍，內守桃康，玄母抱圖，五神黃寧，胞根八解，皇老刻名，九結披散，五毒攝精，拔出三界，反胎仙庭，七元解羅，累祖受生，寶錄太无，俱濟神營，六府煥爽，金書羽經，世爲真仙，披落錦青，帝師纏綿，合景玉清，散香龍窗，玄合

五城，足躡景衢，手排四明，八暉九鍊，飛步雲京，領會六淵，刻名八瓊，五通七合，三氣乃并，萬條重華，世保仙靈，把持玉符，身昇羽庭，徊風合化，玉帝隱經，長契壹運，上願必成，受帝之恩，上朝玉清。

玉清隱書隱玄羽經，一名洞景金玄，玉帝所祕藏。修此之法，當先行大混百神，變化雌雄及帝一上道，然後乃得續行之耳。此之靈章，帝皇之寶篇，解七祖之懋結，保萬神於胎元，攝生道於十方，振靈音以上充。萬徧既周，則身耀金晨，爾乃靈霞妙感，俯徊雲輪，鳴鈴太霄，列位上真。所以俯仰殊格，未行其重故也。

當以本命之日，清齋入室，燒香左右，北面再拜，乃心存於玉帝瓊元君，求得解七玄之愆，乞己神仙。畢，平坐誦經。誦經三徧，輒一過讀高上滅魔玉帝神慧。是夕當十轉隱經，四讀帝慧也。讀畢，乃臨目內視，夷神平氣，坐臥隨意，當叩齒三十通，而微祝曰：

五帝大慧，是謂隱玄，十轉四迴，

滅魔召真，七靈同期，大混五神，瓊音八震，上元七玄，玄風散靡，扇伐胞根，長保胎嬰，世受真仙，上昇上清，玉帝之軒。

畢，又叩齒三十通，咽液十過。於是百神並會，五藏夷平，帝君歡熙，太一保生，體清氣固，魂柔魄寧，司命定錄，皇老書名，人无哭己，飛輪玉清，胞結解散，八暉同形，大福纏綿，七玄同榮。十轉既竟，心拜四方，所以尊妙高靈也。長齋之士，絕交人事，體清服潔，隱靜別處，亦可日日誦習。或可甲子之日，及諸八節之日，此皆上元朝宴之時，不必須待本命日，爾乃行事也。夫十轉隱經之時，皆太一監察，司命定生，萬靈混合，帝君凝形，三宮會真，九房受靈。是其夕也，當有玄感妙應，靈瑞吉祥，然後八素鬱軀，三元授真也。

夫修此之道，惟使精專，存真念氣，心誠苦密，憂樂輒軻，不忘於至道，然後冥感易會，法輪速昇，晨登太霄，飛行陰房矣。若乃情散萬念，精誠不固，形屍穢濁，心无至慕，犯慢靈禁，動


違科素者，則帝君糾其罪，禍敗纏其軀，己身无仙冀，七玄更被囚，魂鬼入風火，年劫增其尤，奉禁者靈仙，犯違者身誅也。

道士體不平和，覺疾病之處，可隱靜別室，啓乞神明，求得解脫愆羅及七玄之罪，聽得轉經，存念真氣，禮祝如法。施行都畢，乃靜身安寢，自然魂胎內固，三關受靈，邪毒散出，體夷氣平。既悟之後，覺身體康寧，都無復痾疾矣。若他人疾病，有諸急難之地，皆聽為轉經。當先啓告神靈，北向再拜，說某名字於玉清瓊元君，求得上解某愆及七祖之罪，濟生十方，身勉八難，然後燒香隱誦，祝請如法，大福皆應身。登齋入室，七日轉經，名曰大混百神，朝會帝一，解愆脫羅，攝生濟厄，无不受恩。此玉帝上法，不可輕履屍穢，及干冒淹濁，三天察過，罪同漏泄，慎之慎之。


上清高上滅魔洞景金元玉清隱書經

上清高上金元羽章玉清隱書經


如是羽章玉清隱書萬靈隱音，高上玉帝藏之玉清上官瑤臺瓊房之內，侍經蘭庭玉女安綠梵、皇明基等七百人，北漠金仙玉童齡慧聰、王定雲等五百人，執夜光寶明，常散三氣返香之華，以拂神經之上品。是五帝萬仙衆聖，一月皆三登玉清上官，散香朝真，禮於神經也。

北臺金玄洞微玉清消魔大王，生平始劫之中，二儀分判，三象植靈，天地翳莽，幽幽冥冥，正誕於北漠廣寒之庭，平丘中域寒谷之濱，元爲我父，玄爲我母，始結我身，以三氣爲字，諱曰：。我脫落紫胞而六眼煥精，竦身九千萬丈，體生百變之光，七元交絡，洞映玉形，三景待以朗曜，日月爲之開明。於是受命高上玉皇，授以金真玉光紫文丹章，玉璽鳳函命魔靈幡，封掌九玄，總領五岳，檢攝北艷，

匡正三五，馘斬六天，受任上官，威制萬靈。太上以瑤臺玉女七千人，金仙玉童二千四百人，執華散香，侍衛於王，金頭巨獸備於玉闕，治北帝寒鄉廣靈之宮，時乘碧霞九色流鈴飛輿紫蓋，從桑林千真，上昇太虛，遊冥玉清，東詣青華，校定方諸，西遊龜山，定錄天真，南方之洞陽南極上元，削死注生，勒錄安昌，中禮金闕太上玉京，受事於無極，總司於五方，典生死於圖籍，制群妖於北艷，上統無上，下領無淵，五嶽四瀆十二河源萬仙羣靈，莫不咸隸於王焉。

消魔大王治天北廣寒七寶宮下，領北羅艷山，山在北方癸地，高二千六百里，周迴三萬里，其山并有七寶珠宮，皆鬼神所住。山下有萬丈之谷，名曰丘寒之泉，則是鬼神之獄，北帝大魔王即住在山上紂絕陰天宮中。有大魔王，姓宛躬，諱，產生，官屬三萬八千人，名悉隸屬於消魔大王。凡後學成仙，消魔大王皆使大魔王保舉列言，然後乃得飛行上清。大魔王常欲

敗人之學，惡人得仙，得仙便成大魔王之上真，故學常爲大魔王所試，多有不過，皆是大魔所敗。學者有知大魔王秘名，所住宮府，則不被試校，亦自然得保舉於上清也。兆爲學常當誦消魔王百神之呪，則攘於大魔之試，魔試既滅，真靈尅降，得見真形，便白日飛騰，上昇玉清之宮。大魔王衣玄文之裘，頭戴橫天之冠，腰帶龍頭之劍，常乘羽輪之車，飛行雲中，常作謠歌，有三千言，亂敗於後學。故太上具書其曲，在消魔寶真經中，有知其曲，則試敗不行，無復有傷壞之患。

東方青帝大魔王，姓迫落，諱，萬形，頭戴橫天之冠，衣青羽之裘，腰帶青綬虎頭鞞囊，或著絳章單衣，或化爲青赤二色之光，領官屬九千人，住在東方安大堂鄉納善之世。常以春分之日，乘青輪羽車，飛行雲中，遊宴五岳，試敗學仙之人。凡修仙之道，當以此日入室西向，誦玉清紫道虛皇上君消魔呪一遍，則天魔自滅，又不被試。九年則致紫道虛皇上君降形於

兆身，修行自致感應，仙道自成也。高上玉形之道，輕泄滅身亡命。

東方青帝玉司君，常於春分之日，攝東方青帝大魔王，上詣鬱悅那林昌玉臺天紫閣之下，受事於玉清紫道虛皇上君也。當此之日，亦應誦消魔智慧百神呪一遍也。

西方白帝大魔王，姓鄧，諱**山**，兒呼，頭戴橫天素冠，衣白羽之裘，腰帶素靈之綬五色虎頭鞞囊，或著皂紬單衣，或化爲老嫗，巾白巾，手執金板，或化爲紫蒼二色之光，領官屬七千人，住在西極福堂州盛行之世。常以秋分之日，乘白輪羽車，飛行雲中，遊宴五嶽，試敗學仙之人。凡修仙之道，當以其日入室南向，誦玉清翼日虛皇上道君消魔呪一遍，則天魔自滅，又不被試。一十二年，則致翼日虛皇上帝君降形於兆身，修行自致感應，仙道自成也。高上玉祕之道，輕泄滅身鬼官。

西方白帝玉司君，常以秋分之日，攝西方白帝大魔王，上詣高桃厲冲龍羅天玉闕之下，受事於玉清翼日虛皇

上道君也。當此之日，亦應誦消魔智慧百神呪一遍也。

南方赤帝大魔王，姓赭，諱**明**，上桓，頭戴橫天朱冠，衣青羽之裘，腰帶丹靈之綬虎頭鞞囊，或著黃羅之衣，或爲人頭鳥身，身如鳳凰，或化爲玄黃二色之光，領官屬八千人，住在宛梨城境弃賢之世。常以夏至之日，乘赤輪羽車，飛行雲中，遊宴五嶽，試敗學仙之人。凡修仙之道，當以其日入室北向，誦玉清昌陽姬虛皇高元君消魔呪一遍，則天魔自滅，又不被試。一十八年，則致昌陽姬虛皇高元君降形於兆身，修行自致感應，仙道自成也。高上玉祕之道，輕泄滅身。

南方赤帝玉司君，常以夏至之日，攝南方赤帝大魔王，上詣碧落空歌餘梨天朱閣之下，受事於玉清昌陽姬虛皇高元君也。當此之日，亦應誦消魔智慧百神呪一遍也。

北方黑帝大魔王，姓梟，諱**黑**，搖公，頭戴橫天玄冠，衣玄羽之裘，腰帶玄靈之綬虎頭鞞囊，或著青紗單衣，

或爲人身蛇頭，或化爲青白二色之光，領官屬五千人，住在鬱宣野清靜之世。常以冬至之日，乘黑輪羽車，飛行雲中，遊宴五嶽，試敗學仙之人。凡修仙之道，當以其日入室西南向，誦玉清七

靜導生高上虛皇君消魔呪一遍，則天魔自滅，又不被試。十五年中，則致七靜導生高上虛皇君降形於兆身，修行自致感應，仙道自成也。高上玉祕之道，輕泄滅命。

北方黑帝玉司君，常以冬至之日，攝北方黑帝大魔王，上詣迦摩坦婁于翳天玄閣之下，受事於玉清七靜導生高上虛皇君也。當此之日，亦應誦消魔智慧百神呪一遍也。

西北方浩帝大魔王，姓光明，諱**明**，法明，頭戴橫天紫冠，衣紫羽之裘，腰帶紫綬虎頭鞞囊，或著白紗單衣，或爲女子，作飛雲髻，手執金杖，或化爲紫白二色之光，領官屬萬人，住在西北福德之野延賢之世。常以立冬之日，乘紫輪羽車，飛行雲中，遊宴五嶽，試敗學仙之人。凡修仙之道，當以其

日入室東南向，誦玉清太明虛皇洞清君消魔呪一遍，則天魔自滅，又不被試。十二年中，則致太明虛皇洞清君降形於兆身，修行自致感應，仙道自成也。高上玉祕之道，輕泄滅身。

西北方浩帝主司微君，常以立冬之日，攝西北方浩帝大魔王，上詣扶刃蓋華浮羅天紫閣之下，受事於玉清太明虛皇洞清君也。兆當此之日，亦應誦消魔智慧百神呪一遍也。

東南方昊帝大魔王，姓方生，諱𠄎灾展，頭戴橫天黃冠，衣黃羽之裘，腰帶黃綬虎頭鞞囊，或著紫紗單衣，或爲人頭蛇身，口銜素綬，或化爲蒼綠二色之光，領官屬六千人，住在東南元福田用賢之世。常以立夏之日，乘黃輪羽車，飛行雲中，遊宴五岳，試敗學仙之人。凡修仙之道，當以其日入室西北向，誦玉清始元虛皇太霄君消魔呪一遍，則天魔自滅，又不被試。十五年，則致始元虛皇太霄君降形於兆身，修行自致感應，仙道自成也。高上玉祕之道，輕泄滅身。

東南方昊帝主司微君，常以立夏之日，攝東南方昊帝大魔王，上詣具渭耶渠初默天黃閣之下，受事於玉清始元虛皇太霄君也。當此之日，亦應誦消魔智慧百神呪一遍也。

東北方倉帝大魔王，姓邵，諱𠄎無量，頭戴橫天青冠，衣青羽之裘，腰帶青綬虎頭鞞囊，或著綠紗單衣，或龍頭人身，手執青節，或化爲火精，領官屬九千人，住在福集都長安之世。常以立春之日，乘蒼輪羽車，飛行雲中，遊宴五岳，試敗學仙之人。凡修仙之道，當以其日入室西南向，誦玉清七觀無生虛皇金靈君消魔呪一遍，則天魔自滅，又不被試。十年，則致七觀無生虛皇金靈君降形於兆身，修行則自致感應，仙道自成也。高上玉祕之道，輕泄殃連七祖，己身亡命。

東北方蒼帝主司微君，常以立春之日，攝東北方蒼帝大魔王，上詣冲容育鬱敵沙天青閣之下，受事於玉清七觀無生虛皇金靈君也。當此之日，亦應誦消魔智慧百神呪一遍也。

西南方黃帝大魔王，姓五烏盈，諱𠄎通勃，頭戴橫天綠冠，衣綠羽之裘，腰帶綠綬虎頭鞞囊，或著黃紗單衣，或爲一人九頭，手執金戟，或化爲紫皂二色之光，領官屬七千人，住在西官延福鄉仁靜之世。常以立秋之日，乘綠輪羽車，飛行雲中，遊宴五岳，試敗學仙之人。凡修仙之道，當以其日入室東北向，誦玉清八觀高元虛皇停景君消魔呪一遍，則天魔自滅，又不被試。九年則致八觀高元虛皇停景君降形於兆身，修行自致感應，仙道自成也。高上玉祕之道，輕泄被考滅身，殃及七玄。

西南方黃帝主司微君，常以立秋之日，攝西南方黃帝大魔王，上詣單緣察寶輪法天紫閣之下，受事於玉清八觀高元虛皇停景君也。當此之日，亦應誦消魔智慧百神內呪一遍也。

八方大魔王，皆與六天同生，而其官屬皆有萬衆，遊行則從鬼兵，幡蓋麾節，五色玄黃，飛行雲中，或在五嶽，下歷八間，妬害仙道，試敗學仙之人，不

欲令得仙，故高上八帝君，以消魔神呪威而制之。學者徒知上皇至諱，不知天魔之名，仙道終不得成。有知魔王祕諱，而以神呪制之，魔王便自連名保舉，列言於玉清，仙道無不成也。其法玄妙，高上藏之於幽匱七寶金堂，萬劫一宣，自無金名玉字，列圖帝籍，終不得見其文。有得此法，不學自仙，高上以左官執殺侍衛，檢慢輕泄非真，七祖充責，己身滅命，幽執三塗，萬劫不原。

玉清消魔大王金玄百神內咒隱文

高虛撫閒，四氣肅恭，玄玄八會，金磬朗空，玉慧逸霄，洞微發衝，四景敷靈，六度休冲，鍊化合變，飛步霞峰，高會玉清，三元上宮，朝宴九帝，八朗丹窗，明上開道，七元煥通，清波遐鏡，精散玉房，高真森羅，鬱若流光，金仙執華，素靈散芳，飛天巨獸，備衛玉皇，二象停虛，三暉翳昏，神符萬變，七星交奔，九帝顯蓋，徘徊洞門，峨峨高虛，巍巍德尊，混生萬化，陰察聖源，檄命五帝，徵召上元，消魔變威，迴風迅雷，掃除妖祟，收攝魔群，束精捕靈，受命

帝君，有罪者戮，有功者原，勒名三天，主司大神，金玄玉慧，皆如玉文，鬱羅廣都，兆生私存，玄幄總命，乘空無輪，百神之宗，日發易遷，悟達之門，度法含光，運長彌劫，速離開神，華寢明寶，皆是北艷魔王，謠歌玄音，亂我雲營，仙按名檢，察付玉晨，高上之命，悉如太真。於是五老策轡，高秀皇庭，羽裙玉袂，錦帔流鈴，金冠紫佩，日華吐精，靈光曜輪，八暉玄清，五帝翼輿，輔輪四明，洞天盼觀，妙景雲營，天扉解關，靈禁開明，翹騰紫霄，八塗合冥，道妙遠暢，遊夢上清，七聖同符，理命長生，三迴五轉，拔度七星，太一務猷，勒錄仙庭，凌梵履昌，五氣合并，十絕牢張，開度丹名，玄母歡熙，永保常生，白元無英，日會黃寧，五老齊契，枝秀華榮，保錄南仙，莫不胎嬰，三氣觀光，金仙浴形，朽尸騰飛，上昇三清，太一校魔，天元攝精，滅試消凶，不得妄生，六師揚電，放擲火鈴，威振八界，十方肅靈，龍飛鳳翔，上披四明，丹文錄字，金書羽經，世保景龍，運契仙庭，九真纏綿，

上願尅成，制魔保舉，飛登玉清。

消魔金玄百神內篇，皇上寶祕，藏之瓊宮，授於上聖，不傳下仙，有金名玉字，列圖朱軒，胃藏生華，當得此文，修行萬徧，駕景乘雲，飛騰三清，出入帝晨，上開七祖，解拔宿根，度生錄於南宮，保紫胞於胎元，攝生道於十方，命玉慧於金房，希靈霞於妙感，撫八會於九空，爾乃招真景以曲降，覩神顏於玉皇，期徽章於蘭庭，制天魔於北艷。

凡行此道，常以八節及本命、太歲之日，轉經行道，履行名山，皆當北向，叩左齒三十二通，切聲而誦篇。誦詠一篇，神朗氣清，天魔滅景，仙道自成。輕泄此法，七祖充責，己身亡命，終不得仙。

玉清紫道虛皇上君鬱悅那林昌玉
臺天中消魔智慧呪隱文金玄羽章

玉天四張，八世高靈，二羅煥落，玉慧洞清，金唱虛音，振響紫瓊，百和結真，檢制魔名，三波夷恬，瀆格賈生，吐毒納善，嘯命鬼兵，北艷不拘，放浪雲營，玉帝唱嘯，羣魔摧傾，六天滅景，

三道布靈，皇上散暉，我道已明，太一勒籍，務猷保生，公子度符，拔解七星，五苦咸散，朽骨仙榮，滅試保真，羽服鬱青，帶金佩玉，交落流鈴，迴合玉霄，同入黃寧，萬禁開塗，飛騰紫庭。

玉清翼日虛皇上道君高桃厲冲龍
羅天中消魔智慧呪隱文金玄羽章

高桃奕奕，龍羅昂昂，金暉騫張，四明煥光，景雲秀虛，朱蘭洋洋，玉房紫階，交雲四通，離羅翼翼，神宇堂堂，金靈曜虛，暎帶神王，五老八景，上合牢張，神昌玉慧，嘯朗發空，飛精羽蓋，舞輪空洞，三入北清，二謁上官，勒命北帝，檢攝魔王，斬滅六天，嚴勅北酆，束精縛妖，受事玉皇，獲然魑蜺，萬萬皆崩，道布三真，成我仙公，陵梵履昌，守固絳宮，司命保筭，丹書南昌，解拔七玄，腐骨更翁，起度三塗，翱翔霄峰，滅試召靈，消魔同功，道合帝一，乘景策龍，飛登高桃，龍羅天中。

玉清昌陽姬虛皇高元君碧落空歌餘
梨天中消魔智慧呪隱文金玄羽章

北帝放大魔，謠歌繞雲陳，氛氛翳

空洞，翦翦亂天真，飛行九玄霞，肆羣數萬千，乘虛參天氣，試或干我仙，高上命玉慧，羽章朗金玄，十絕迴朱景，神唱自成真，靈幡徵萬魔，肅若風拂塵，束精滅賈生，封檢北酆山，崑崙配祆端，絕景消魔篇，五老度符籍，司命定命年，幽寥伯吏車，合景鍊我身，靈暉暎帝席，携提高上人，赤子招神公，降致八帝賓，飛登碧落庭，飄颻入三便，拔解五苦根，返胎生七玄，朽骨皆昇飛，同入虛无煙。

玉清七靜導生高上虛皇君迦摩坦
婁于翳天中消魔智慧呪隱文金玄

羽章

七靜乘劫迴，飛虛入北元，隱息洞清館，曖曖陵景雲，飛行盼陰房，日月植靈根，推度三象運，七星煥以分，天魔橫雲宮，穢氣何紛紛，宛勒當道生，稱爲大魔羣，謠歌蓋空洞，亂惑學仙門，虛皇命八帝，上披于翳關，金玄朗玉慧，清誦消魔篇，催檢攝北帝，上對玉清君，束魔滅祆試，悉如九天文，洞陽鬱靈標，閉固死尸源，解胞散滯血，

百節生正神，正神輔我身，制魔命長存，靈福充七祖，返胎生來仙，保真迦摩天，世爲道德尊。

玉清太明虛皇洞清君扶刀蓋華浮
羅天中消魔智慧呪隱文金玄羽章

飛皇盼雲輿，洞清暎浮羅，玄湄散朱軒，朝靈朗太霞，汎真玄霄上，晃晃曜景華，三清保劫用，同此億椿柯，蕭蕭乘神清，握節檢天魔，五老徵北帝，收攝鬼神家，赭鄧掩天真，壅塞萬仙阿，金玄洞玉慧，羽章滅謠歌，命篇束群祆，受事詣消魔，携仙迴帝席，汎此玄津波，秀朗寶太暉，真人互翻葩，五靈度符籍，延昌固命柯，保我萬劫功，誰測天紀多，七祖上生天，解脫度幽羅，洞清滅仙試，身飛昇玄都。

玉清始虛皇太霄君具渭耶渠初默
天中消魔智慧呪隱文金玄羽章

皓暎太霄，乘虛而迴，金華曜晨，龍景空飛，玉仙俠侍，五老扶麾，太陽啓津，七元煥開，五帝齊真，三景徘徊，宴輪雲房，上披朱機，徵命八天，總攝四垂，萬靈束帶，受事太微，擔天折額，

承間吐威，謠歌飛空，試惑我懷，勒名北帝，檢剪無遺，神真出遊，天地傾摧，羣魔降伏，仙仙皆飛，沖成曲文，與我同暉，元父玄母，萬神總歸，超步玉霞，身登金梯，拔出三塗，七玄散披，保仙太霄，福慶巍巍。

玉清七觀無生虛皇金靈君沖容育鬱敵沙天中消魔智慧呪隱文金玄

羽章

沖虛暎晨燈，晬晬廣陵堂，寶雲扇九嶺，玉房坐虛皇，紫寶表玄籍，迴風孩道康，金符召渡卿，靈幡攝魔王，器靈滅萬試，合仙成我功，于景寶命生，運珠守上宮，靈灌七關府，返老化嬰童，拔出地戶難，保此日月光，七祖離幽夜，受福南極房，金符入玄室，身飛昇沖容。

玉清八觀高元虛皇淳景君單緣察寶輪法天中消魔智慧呪隱文金玄

羽章

淳景輪法天，八觀暎玉清，飛華落散景，返香流金庭，虹暎煥玄臺，三帝合啓明，蕭刃侍金門，保此累劫生，北

元促天運，杖幡徵五靈，禁閉北艷宮，宴麾檢雲營，高上觀八荒，謠歌從何生，郁育鼓洋道，稱號灑八冥，羽書攝羣祿，金玄束萬精，魔王並受事，滅試消魔經，玄命應符會，五帝勅己清，公子執五符，太一固我形，三元標錄籍，刻書東華瓊，七玄皆昇飛，同歡八觀庭。

消魔智慧呪金玄隱文，皆結飛玄

自然之氣以成其章，煥乎八天之上，鬱乎玉清之中，制魔定真，滅試招仙，金音逸朗於紫虛，玉慧振響於霞庭。故高上浮輪以嚴試，虛皇策轡以觀真，輔玉仙以侍衛，命五老以檢靈，上標玄妙之貴行，下崇巍巍乎難稱，福慶充於玄葉，重廕流於種躬，朽骨蒙其玄賴，受更生於胎仙，高難可名，神難可宣，故上聖置篇，稱爲隱文焉。八天虛皇帝君受之於九空，以傳玉清玉帝君消魔大王，大王以傳五帝上真君，以傳高上玉皇君，高上玉皇君以傳太帝，太帝以傳太上大道君，太上大道君以傳太微天帝君，太微天帝君以傳後聖九玄金

闕帝君，帝君以傳上相青童君。皆真真相承，集爲靈文，依科皆七千年聽傳合仙之人，自無金名帝圖，錄字上清，不得妄宣。輕泄此道，殃及七祖，己身亡命，明慎而奉焉。若有簡名紫臺，應得此文，當以信立心，交齋上金八兩，丹錦八十尺，紫紋六十尺，師與對齋八十日，或二十七日，告盟而傳。無盟而輕泄，則愆天信，罪延七祖，殃鐘後嗣，世世盲聾，身不得仙。

修行此道，每至八節之日，當隨節各誦一遍。又以本命、甲子、太歲之日，及當登齋行道，誦經三十九章，雌一五老寶經，玄母八門行間十二上願，悉當並誦八天智慧呪一遍。若遊行名山，或之方面，求神仙之道，當隨方誦一遍，然後行事。如此萬試自滅，魔王敬護，所向皆合，所作尅成，真人降形，致自然靈藥，身暎玉光，神仙內唱，飛行上清。

玉清鬱悅那林昌玉臺天九暉太晨
隱書金玄內文



文始先生所佩，以傳鬱絕真人。

凡修神仙之道，當以白書青板上，置東方，以滅東方青帝大魔王官屬，招致東方仙官。行之九年，則青真上聖皇上丈人降形於兆身，役使仙官，取自然靈藥。又以白書青繒佩身，行來東方，則致安大堂鄉納善之世界大魔王，束帶稽首禮迎，仙官侍衛。入東嶽，則致青雲羽蓋。九年飛行上清宮。無此文，不得妄行東方青帝之道，輕召青帝仙官，則為大魔所傷，失真被殃，終不成仙。


玉清高桃厲冲龍羅觀靈元晨隱書
金玄內文



九老仙都所佩，以傳廣靈丈人。

行神仙之道，當以赤書白板上，置西方，以滅西方白帝大魔王官屬，招致西方仙官。行之十二年，則白景素靈七聖金靈君降形於兆身，役使仙官，取自然靈藥。又以朱書白繒佩身，行來西方福堂州盛行之世界，大魔王束帶稽首禮迎，仙官侍衛。入西嶽，則致素雲羽蓋。十二年飛行玉清宮。無文則不得妄行西方白帝之道，及入西嶽輕召白帝仙官，則為大魔王所傷，失真被殃，終不成仙也。

玉清碧落空歌餘梨天總晨九極隱
書金玄內文



玉清高上元君所佩，以傳南極上元君。行神仙之道，當以黑書丹板上，置南方，以滅南方赤帝大魔王官屬，招致南方仙官。行之一十八年，則洞陽丹

靈上真景君降形於兆身，役使仙官，取自然靈藥。又以黑書絳文佩身，行之南方宛梨城境弃賢之世界，則大魔王束帶稽首禮迎，仙官侍衛。入南嶽，則得南極寶書，致丹雲羽蓋。一十八年，飛行玉清宮。無此文，不得妄行南方赤帝之道，及入南嶽輕召赤帝仙官，則為大魔所傷，失真被殃，終不得成仙也。


玉清迦摩坦婁于翳天杳曜旋根隱
書金玄內文



九天真王所受，以傳太上道君。行神仙之道，當以黃書黑板上，置北方，以滅北方大魔王官屬，招致北方仙官。十五年，則致北極玄上玉真君授兆高上寶書，役使仙官十五人。又以黃書皂文佩身，行之北方。鬱亶之野清静世界，則萬靈束帶，魔王稽首禮迎，仙官侍衛。入北嶽，則致玄雲羽蓋，飛


行玉清宮。無此文，不得行北方黑帝之道，及入北嶽輕召仙官，則為大魔所傷，被殃失仙。

玉清扶刀蓋華浮羅天玄景晨平隱書金玄內文




太素三元君受之於元始天王，以傳太和玉女。行神仙之道，當以紫華書黃板上。置西北方，以滅浩帝大魔王官屬，招致西北福德之野延賢世界仙官。十二年，則致上宮玉女降兆寢房，授兆神真之道。又紫筆黃紋上佩身，行之西北延賢世界，則萬靈束帶，魔王稽首禮迎，得乘飛雲羽蓋，遊行玉清宮。無此文，不得輕行神仙之道，呼召仙官，則為大魔所傷，身沒失仙。

玉清具渭耶渠初默天合暉晨命隱書金玄內文




扶桑大帝受之於太霄真王，以傳太微天帝君。當以黃筆書蒼板上，置東南方，以滅昊帝大魔王官屬，招致東南方福田用賢世界昊帝仙官。十五年，則致玉女二十四人，給兆驅使，取自然靈藥飛行之丸。又以黃書綠紋上佩身，行之用賢世界，則萬靈束帶，魔王稽首禮迎，得乘綠雲羽蓋，飛行玉清宮。無此文，不得輕行神仙之道，呼召仙官，則為大魔所傷，身被大殃，不得仙也。

玉清冲容育鬱離沙天齊暉晨玄隱書金玄內文



西王母受之於北極皇上先生，以傳赤精上真君。當以青書紫板上，置東北方，以滅蒼帝大魔王官屬，招致東北方福集都長安世界蒼帝仙官，十年則致仙童十八人，給兆驅使，取自然靈藥，高上飛玄羽章。又以青書生紫紋上佩身，行之東北長安世界，則萬靈束帶，魔王稽首禮迎，得乘紫雲羽蓋，飛行玉清宮。無此文，不得輕行神仙之道，呼召仙官，則為大魔所傷，身被大殃，不得仙也。

玉清單緣察寶輪法天高上龍煙隱書金玄內文



後聖九玄金闕帝君受之於高元虛皇停景君，以傳上相青童君。當以黃書綠板上，置西南方，以滅黃帝大魔王官屬，招致西南方延福鄉仁靜之世界黃帝仙官，九年則八帝侍真玉仙降形

於兆身，授兆飛仙靈藥，七十四變光鍊化兆身也。又以黃書綠紋之上佩身，行之西南延福鄉仁靜世界，則萬靈束帶，魔王稽首禮迎，三元降下飛輿瓊輪，迎兆登三元之房也。無此文，不得輕行神仙之道，呼召仙官，則為大魔所傷，滅身失仙也。

玉清八天中隱書金玄內文，生於元始之先，結飛玄之氣以成於玉文，即玉清天中之書也。字方一丈，煥明太空，制魔滅精，召神攝靈。故上聖相承，受之以威神。此文隱藏，不傳於世，自無金名蘭臺，玉字紫房，不得見聞。得有其篇，高上給以玉童十二人，玉女八人，侍真典經，防衛有文者身，糾於漏慢。輕泄則七祖受責於地獄，己身被考於三官。鐘山虛無子受之於黃老君，佩身九年，內外暎徹，隱文自明，羅列一形之中，光曜九府，照明十方，身所佩本文飛入八天。至開光元年正月一日，於鐘山脫身，隱文以傳鬱靈真人鮑世玄。世玄即秦穆公侍郎，今受號為鬱絕真人，治在九疑山洞室

之中。後聖九玄金闕帝君，下為周師，改號為老子，以八天隱文授於幽王。幽王自謂居自然之運，代五帝之氣，錯陰陽之化，不崇天文。老子知周文衰，收文而去周西度，制作教化，遇關令尹喜，喜心結紫絡，面有圓明，項帶承天，背負七元，金名表於玄圖，丹札係於紫房，氣參太微，觸形合真，即為述道德經上下二章。於綠那之國，老子張口，於是隱文從口而出，以授於喜。喜依盟奉受，即致八景雲輿，洞遊八方，竦身於虛無之內，項生寶明之光，七十二相，暎照一形，隨運變化，昇入八天。其道高妙，非可載稱。凡以後學，不得此文，便當絕思於遐望，無煩損神於幽山也。

上相青童君以此文傳西城王君，位登四極真人，今封一通於西城山中。若有金名紫字，當以庚子、壬寅、庚午、戊午之歲，四月八日、七月七日、十月一日，於八天世界精思苦念，當得此文。

上清高上金元羽章玉清隱書經

金玄羽章玉清隱書，藏經有兩部，文並同，符則各異，故附篆于後。


九暉太晨隱書金玄內文

觀靈元晨隱書金玄內文


總晨九極隱書金玄內文

沓曜旋根隱書金玄內文


玄景晨平隱書金玄内文




合暉晨命隱書金玄内文



齊暉晨玄隱書金玄内文



高上龍煙隱書金玄内文



①『北方』，原本誤作『鬱方』。

(王卡點校)